

近代中國史料叢刊續編第八十二輯

沈雲龍主編

辛亥殉難

記
吳慶坻
金梁補修

文海出版社

有限公司
印行

吳慶坻修·金梁增訂

辛亥殉難記

據民國二十四年刊本

辛亥殉難記卷首

恭錄

諭旨

宣統三年九月初六日內閣奉

上諭張鳴岐電奏新任廣州將軍鳳山由滬來粵初四日辰刻登岸行至南門外突有炸彈轟發轟倒道旁民屋牆壁鳳山所乘肩輿亦被摧壓隨經將火撲滅搜出鳳山屍身懇恩賜卹等語廣州將軍鳳山由京旗章京洊升副都統都統訓練近畿各鎮備任荊州將軍調補廣州將軍官力有年克勤厥職茲因赴任甫經到粵猝遭慘害深堪憫惻著加恩予諡追贈太子少保銜照將軍陣亡例從優賜卹任內一切處分悉予開復應得卹典該衙門查例具奏靈柩回旗時沿途地方官妥爲照料准其入城治喪並著該旗將該將軍子嗣查明具奏候旨施恩欽此 尋奉

旨予諡勤節

宣統三年九月十四日

上諭山西巡撫陸鍾琦忠勤亮達學問優長由翰林簡放道員歷任監司將膺疆寄均能認真整頓克稱厥職此次倉卒遇害深堪憫惻著加恩予諡照總督陣亡例從優賜卹任內一切處分悉予開復應得卹典該衙門查例具奏靈柩回籍時沿途地方官妥爲照料並著綏遠城將軍堃岫查明該員子嗣暨遇害詳細情形迅速具奏候朕施恩欽此

十二月初二日

上諭已故山西巡撫陸鍾琦忠誠報國臨難捐軀業經降旨優卹伊妻唐氏同時殉難伊子陸光熙救父被戕忠孝節義萃于一門披覽呈詞彌深憫惻陸鍾琦著再加恩賞給二等輕車都尉世職一品命婦陸唐氏著准予旌表翰林院侍講陸光熙著追贈三品京堂照二品京卿陣亡例從優賜卹並著加恩予諡陸鍾琦之孫陸鼎亨著以主事用其同時死難之協統譚振德著照協都統陣亡例從優賜卹管帶熊國斌著照正參領陣亡例從優賜卹僕馬八牛萬春李升均著照兵丁陣亡例從優卹賞以慰忠魂欽此

尋奉

旨陸鍾琦予諡文烈 陸光熙予諡文節

宣統三年十月初七日兩江總督張人駿電奏衆寡不敵之統將王有宏陣亡情形初八日奉

諭旨統領擬保提督銜總兵王有宏中彈陣亡著照提督陣亡例從優賜卹欽此內閣議奏擬請照例給騎都尉兼一雲騎尉世職襲次完時給予恩騎尉世襲因替從優追贈太子少保銜并給卹銀一千一百兩以慰忠魂而作士氣十一月二十六日奉

旨依議欽此

此據實錄館現行月摺及政治官報

宣統三年十月初七日

上諭電寄江甯將軍鐵良載穆業經身死應得處分著免其置議並著鐵良將該副都統死事情形查明具奏

此據實錄館電摺

宣統三年十月十五日

上諭江西巡撫馮汝駿忠勤敏練學問優長由翰林改官部屬供職樞垣外任府道洊陟監司擢齊疆寄宣力有年克勤厥職茲以江西省城失陷從容就義大節凜然殊堪軫惜著加恩予諡照總督陣亡例從優賜卹任內一切處分悉予開復應得卹典該衙門察例具

奏靈樞回籍時沿途地方官妥爲照料伊子二品廕生馮邁著以郎中補用監生馮邁著以主事用以勵臣節而慰忠魂欽此

尋奉

旨馮汝騫予諡忠愍

宣統三年十月十八日

上諭內閣代遞訥勒赫等奏大臣殉難據情代奏一摺閩浙總督松壽老成練達志慮忠純由部屬簡放外任洊膺疆寄旋授將軍都統總督閩浙宣力有年克勤厥職茲以福建省城失陷從容就義大節凜然殊堪軫惜著加恩予諡追贈太子少保並賞給二等輕車都尉世職照總督陣亡例從優賜卹任內一切處分悉予開復應得卹典該衙門察例具奏靈樞回旗時沿途地方官妥爲照料伊子郵傳部員外郎光裕著以郎中補用理藩部郎中光耀著以道員用以示篤念忠盡至意欽此

尋奉

旨松壽予諡忠節

宣統三年十月二十二日

上諭內閣奏黑龍江海倫府境剿匪陣亡之巡防馬隊管帶譚鳳亭從優賜卹欽此

此據實錄館

現行月報

宣統三年十一月初五日

上諭內閣奏總兵大員城陷殉難據呈代奏一摺廣東潮州鎮總兵趙國賢由行伍歷保記名提督補授廣東潮州鎮總兵充武衛軍統領陸軍第六鎮統制官訓練士卒宿衛宮禁頗著勤勞茲在潮州任內因城陷自盡實屬忠烈可風著加恩予諡追贈太子少保銜賞騎都尉兼一雲騎尉世襲因替給卹賞銀一千兩照提督陣亡例賜卹任內一切處分悉予開復應得卹典該衙門查例具奏伊子趙玉堂著以主事用欽此

尋奉

旨趙國賢子諡忠壯

宣統三年十一月初六日

上諭內閣奏廣東提督秦炳直呈稱管帶守備何培清在博羅縣守城苦戰中槍身死幕友

優附生何承鑫府城將陷自縊而殞均屬忠義可嘉著該衙門查例從優議卹欽此

此據實錄

館現行月報

宣統三年十一月十九日

上諭署四川總督端方才猷敏練學識宏通由部屬外任監司洊濟疆寄庚子之變在陝西護撫任內保衛維持厥功甚偉嗣充出使各國考察政治大臣南北洋大臣後因案革職旋以候補侍郎充督辦粵漢川漢鐵路大臣川中亂起派令馳往查辦並署理四川總督宣力有年勤勞素著茲因帶隊入川中途遇害死事情形慘不忍聞殊堪憫惻著加恩予諡追贈太子太保並賞給二等輕車都尉世職照總督陣亡例從優賜卹任內一切處分悉予開復應得卹典該衙門查例具奏靈柩回旗時沿途地方官妥爲照料准其入城治喪伊子外務部參事繼先著以四品京堂候補監生陶馨著以主事補用伊弟三品銜河南候補知府端錦隨行入川因救兄同時被害尤屬忠義可風著照三品官員陣亡例從優賜卹以慰忠魂欽此

尋奉

旨端方予諡忠敏

宣統三年十一月二十六日

上諭內閣奏廣西潯防隊統領補用知府張振德督隊在黃茅地方剿辦賊匪聞匪黨勾結駐防大湟江口巡勇乘機叛亂馳回彈壓甫抵行營猝被狙擊中槍殞命張振德照陣亡例從優贈三品卿銜並給雲騎尉世職襲次完時毋庸給予恩騎尉欽此

廣西巡撫沈秉堃奏請經內閣議准

宣統三年十一月二十七日

上諭內閣代遞富爾遜等爲大員殉難呈請賜卹等語署荊州副都統恆齡由筆帖式洵升協領歷充陸軍部諮議官直隸督練公所參議官朝陽巡防營內領擢任副都統樸誠堅卓久著勤勞茲在荊州副都統署任內因孤城被困援絕竟以身殉實屬忠烈可風著加恩予諡照都統陣亡例從優賜卹任內一切處分悉予開復應得卹典該衙門查例具奏伊子分省試用知縣裕文著以直隸州知州用通判職銜裕謙著以通判用以慰忠魂欽

尋奉

旨復給予諡壯節

宣統三年十二月初六日

上諭伊犁將軍志銳由翰林洊升卿貳歷任烏里雅蘇臺參贊大臣索倫領隊大臣寧夏副都統洊升將軍宣力有年克勤厥職茲在伊犁將軍任內猝遭慘害深堪憫惻著加恩予諡追贈太子少保照將軍陣亡例從優賜卹任內一切處分悉予開復應得卹典該衙門查例具奏靈柩回旗時沿途地方官妥爲照料准其入城治喪伊子監生海昆著以員外郎用以慰忠魂欽此

尋奉

旨志銳予諡文貞

宣統三年十二月十二日

上諭內閣代遞雲南陸軍總參議靳雲鵬呈稱雲南兵變禦亂陣亡文武各員請從優卹賞等語此次雲南兵變統制官鍾麟同督率衛兵拒戰力竭捐軀忠骸支解慘不忍聞鍾麟

同著追贈副都統照副都統陣亡例從優賜卹加恩予諡伊子鍾培英著以主事用兵備處總辦候選道王振畿被執不屈慘遭戕害輻重營管帶范鍾岳中彈陣亡均屬忠烈可風王振畿著照協都統陣亡例從優賜卹范鍾岳著照正參領陣亡例從優賜卹以慰忠魂而昭激勸欽此

尋奉

旨鍾麟同予諡忠壯

宣統三年十二月十二日

上諭內閣代遞那彥圖等奏大臣被害據情代奏一摺福州將軍樸壽由部曹外任監司充庫倫辦事大臣擢授正黃旗漢軍都統福州將軍宣力有年克勤厥職此次福州變起該將軍督兵力戰被執不屈卒被慘害大節凜然著加恩予諡追贈太子太保並賞給二等輕車都尉世職照將軍陣亡例從優賜卹任內一切處分悉予開復應得卹典該衙門察例具奏靈柩回旗時沿途地方官妥爲照料准其入城治喪伊子景康著以員外郎用以示篤念忠盡至意欽此

尋奉

旨樸壽予諡忠肅

宣統三年十二月十四日

上諭軍諮府軍諮使饒白旗漢軍副都統良弼由留學日本陸軍畢業調前練兵處當差歷充軍學司監督副使補陸軍部軍學司司長充禁衛軍第一協統領官洊升饒白旗副都統兼軍諮府軍諮使贊襄戎務頗著勳勞茲以受傷身故殊堪憫惻著照副都統陣亡例從優賜卹應得典卹該衙門查例具奏該副都統有無子嗣著該衙門查明具奏候旨施恩欽此

宣統三年十二月十七日

上諭調補甘肅布政使雲南布政使世增由筆帖式迭充出使各國隨員保升道員歷任監司茲在雲南藩司任內適值省城變亂被拘不屈慘遭戕害大節無虧殊堪軫惜著加恩予諡追贈巡撫照巡撫陣亡例從優賜卹任內一切處分悉予開復應得卹典該衙門查例具奏准其入城治喪伊子卽選部司務祖英著以員外郎用以慰忠魂欽此

尋奉

旨世增予諡忠愍

宣統三年十二月二十五日

上諭內閣據呈懇將殉難道府各員從優賜卹陸軍第八鎮正參謀官正參領銜湖北候補道劉錫祺湖北施南府知府署安陸府知府桂蔭廣東潮州府知府陳兆棠四品銜四川補用直隸州知州署雙流縣知縣汪承第或慷慨捐軀或從容就義均屬忠烈可風劉錫祺著加恩追贈協都統照協都統陣亡例從優賜卹桂蔭陳兆棠均著加恩追贈道員照道員陣亡例從優賜卹汪承第著加恩追贈知府照知府陣亡例從優賜卹以慰忠魂欽此

宣統三年十二月二十五日


上諭內閣代遞典禮院直學士端緒呈報胞弟端錦在川被難情形再懇加恩賜諡等語河南候補知府端錦著加恩准其予諡欽此

尋奉

百端錦子證忠惠

辛亥殉難記序

辛亥殉難記者吳白修提學摻訪是年殉難文武一百五十餘人爲之考實者也推肇亂之由自學校至軍屯創立制度一以不教之民處之列省奉行糜金錢無算其出洋遊學者復不加約束以致流言朋興莽戎潛伏謀國不臧上焉者忽而不察及難發大局已成瓦解之勢詎不痛與我朝教忠之典備矣又恩澤素厚天下臣庶皆有忠義激發之思而臨時董戒之方尤列朝所夙講所謂董戒者何曰賞罰是已咸豐初以粵匪陷鄂誅遁走之巡撫青馨一時官吏咸慄然於王章之不可犯辛亥歲湖北新軍之變總督瑞澂棄城登舟御史臺環請拿問攝政未允由是長沙江甯督撫相率遁走勢不能再下嚴詔徇一己之私心廢祖宗之成法與自棄其國何異光緒中國病亟矣而度支之困虐不及民威柄猶存人心未去得其道而御之誠臣誼士方將引而愈出用而不窮如咸同時可決也何止如提學所記百數十人也哉記中如陸巡撫之一門節義謝總兵之忠憤捐軀皆第一流人物其餘舍生取義足光史冊當茲時事推移斯文垂喪洵不可少之書也後之人觀於人才與世運相維繫之故亦不能無感也夫長沙王先謙謹序



辛亥殉難記目錄

卷首

上諭

卷一 文獻傳一

閩浙總督松壽

署四川總督端方

弟河南候補知府端錦

隨員劉燧

蔡成額

護理四川總督趙爾豐

山西巡撫陸鍾琦

子翰林院侍講陸光熙

協統譚振鐸

管帶熊國斌

江西巡撫馮汝駉

調任甘肅布政使雲南布政使世增

安徽提法使張毅

駐藏左參贊羅長禔

陝西候補道湖南兵備處總辦王毓江

候選道雲南兵備處總辦王振畿

湖北候補道第八鎮正參謀官劉錫祺

署湖北安陸府知府桂陰

湖北宜昌府知府存厚

子一失名

福建汀州府知府來秀

署雲南開化府知府石家銘

護理雲南永昌府知府毛汝霖

山西候補知府陳政詩

弟陳敷詩

陝官陳順興劉占魁

廣西候補知府張振德

湖北候補知府張曾疇

卷二 文職傳二

湖南候補府署長沙縣知縣沈瀛

山西河東監掣同知陸叙釗

子陸文治

山西候補知縣勞謙光

陝西渭南縣知縣楊調元

署陝西華州知州楊宜瀚

陝西鳳翔縣知縣彭毓嵩

子彭解年

陝西三原縣知縣德銳

子失名

浙江蘭谿縣知縣黃爲熊

浙江候補知縣文海

湖北天門縣知縣榮濬

僕成松

湖南嘉禾縣知縣鍾麟

典史何永清

湖南候補知縣申錫綬

四川雙流縣知縣汪承第

四川威遠縣知縣徐昭益

四川西昌縣知縣章慶

兄子章緒

署廣東西甯縣知縣馮汝楨

湖北大挑知縣聯森 子寶煒 姪寶明

署雲南大關廳同知胡國瑞

雲南順甯府教授張舜琴

陝西候補道榮麟 以下至文末諸人事實不詳變例合傳列後

署陝西漢中府知府德祐

陝西候補直隸州寶坪

陝西候補同知廣啓

陝西候補通判嚴濟

陝西白水縣知縣陳問紳

陝西候補知州張存善

署山西陶林同知候補知縣齊世名

山西岢嵐州知州奎彰

山西天鎮縣知縣世泰

山東榮安縣知縣王文城

福建永安縣知縣劉念茲

福建連江縣知縣王榮毅

廣西思恩府知府舒志

雲南順甯府知府琦麟

四川候補知縣文某

湖北候補縣丞錫楨

湖北鮎魚司巡檢程彬

湖北解州司巡檢方祖楨

湖北石花街巡檢王萃奎

子一孫一俱失名

湖北蘄州吏目駱綸

湖北襄陽府某縣典史

失名

宗人府供事張傳楷

山東益都舉人孫文楷以下舉貢附生學生七人附

江蘇江陰貢生趙彝鼎

江蘇高鴻附生施偉

廣東香山附生李澤霖

湖北江陵附生胡穆林

湖南湘潭附生何承鑫

天津學堂教習某生

卷三 武職傳

伊犁將軍志銳 巡撫官劉佐德 教諭官李勳

鑲白旗副都統軍諮府軍諮使良弼

河南南陽鎮總兵謝寶勝 姚國雲

廣東潮州鎮總兵趙國賢

廣西右江鎮總兵黃忠浩

湖南鎮守中營遊擊楊讓梨

廣東

江南記名總兵王有宏

湖北新軍標統張景良

江南督標中軍副將何師程

雲南昭化鎮總兵張嘉鈺

雲南陸軍第十九鎮統制鍾麟同

雲南新軍輜重營管帶范鍾岳

雲南開化巡防營統領孔繁琴

廣東興甯營都司白如鏡

河南左路巡防馬隊管帶候補都司周飛騰

廣東巡防營管帶候補守備何培清

廣東候補守備何培德 疑即何培清而採訪冊有一人姑仍之以俟考

廣東巡防營管帶候補千總張德潤

江蘇巡防營管帶候補千總戚從雲

海籌兵輪管帶本旗前鋒吉陞

廣東提督左營隊官黃新

浙江巡撫衛隊管帶趙翰階 趙翰標

湖北施南協副將倭和布 以下至劉曉堂諸人事實不詳變例合傳列後

湖北荊州城守營參將玉萼

黑龍江海倫府巡防馬隊管帶譚鳳亭

山西南路巡防隊官陳順興

山西南路巡防隊官劉占魁

廣東嘉應州遊擊柏某

湖南長沙協都司熊得壽

湖南巡防營管帶候補遊擊劉駿堂

杭州望江門更夫 無額可歸附列於此 陝西副將銜補用遊擊簡純澤 非辛亥事附列於後

卷四 駐防傳 附江甯駐防死難人民遺孀紀略 各省駐防旗人殉難者多其無事實可記者別列爲表

西安駐防

西安將軍文瑞

西安左副都統承燕

西安右副都統克蒙額

協領斌恆

佐領瑞明

防禦多英 子奎成 奎章 從子奎斌 奎莊

驍騎校奎亮

驍騎校林啟

領催林璋

驍騎校文昭

直隸州州判阿爾精阿

府經歷惠祥 廣興

舉人喜明

舉人惠斌

附生春詳

附生金常

武舉人德森布

音德本 烏爾哲

雲騎尉俊亮 子文輝 文通 孫錫純 孫振 廷英 錫麟

江甯駐防

佐領盛成

防禦哈郎阿

防禦南山 子夫名

防禦松柏

防禦培秀

前鋒興發 錦秀

驍騎校富勒渾布

排長廩生汝霖

教練官恩錫 彭典

將備學堂畢業生魁禱

巡警學校畢業生長明

旗民洪某 劉金祥

叢葬紀畧 增

京口駐防

副都統宗室載穆

協領文延浩

佐領劉文蔚

佐領余世寬

佐領馬普亮

防禦吳吉瑞

驍騎校馬萬選

驍騎校白同源

領催傅德需

排長桂城

排長國權

排長海靖

排長文馨

排長炳陞

馬隊營那康元

荊州駐防

署荊州副都統恆齡

參謀官總帶 恩沛

協領松興

善吉 福全

協領志寬

防禦多瑞

驍騎校金霖

驍騎校炳安

驍騎校哲森

直隸秦甯鎮右營都司榮錦

子朝家 兄子連升

都司赫成額

附編方傳

舉人保知縣迎禧

子果英 吉長

生員保知縣根壽

司書生定海

生員兵備處提調松俊

生員隊官重光 子春年 長年 寶年

生員排長色德本

步隊副軍需官榮勳 子順勳空順 瑞其順

生員錦章 父榮善

生員恩特亨

恩騎尉勒杭阿

雲騎尉榮清

排長寶善 子金生

排長德齡 東良 德培 子天敏 德天華

排長倉生光 子高升

聯長澤麟

福州駐防

將軍樸壽

協領定煊

防禦長瑞

驍騎校巴揚額

教習麟瑞

舉人裕彤

族兄項官備欽額 兄子繼忠

候補筆帖式裕豐

杭州駐防

協領貴林

舉人存炳 佐領哈楚順 子景壽

廣州駐防

將軍鳳山

卷五 列女傳列女表附

關桑氏 子德關郭氏 關白氏 孫一 孫女三

席金氏 子德二 孫四 孫女

舒舒覺羅氏 子德二 孫一

烈女雪雁

趙余氏 子德關氏 女二

趙那氏

王劉氏

洪陶氏

馮吳氏 子德康氏

石甘氏 子德三 女三 孫女二

陳殷氏

嚴格里氏

伊爾根氏

岱屏

右所最錄自疆臣逮佐貳都若干人自將帥逮偏裨都若干人下至賢序之士見危授命闔壺弱質九死靡悔綜厥風軌並著於篇各省駐防死難夥頤其無傳者別列爲表暨伏海上聞見孤陋沉痾溷鬱蓋不知凡幾矣甄錄言行或病疏漏傳聞異辭歧誤間出尙冀並世賢達增益而糾正之或謂捐軀就義情事萬殊宜有條品用章類別然歐陽文忠有言死者人之所難倫紀方隳斬拚焚溺善善從長春秋微指褒譏進退以俟良史今茲所錄僅据事叢述依類編次取便省覽云爾操槩五稔馳書四方其贊助蒐訪者江甯魏梅孫家驊無錫林稚眉志道福州黃石蓀曾源桐鄉勞玉初乃宣仁和葉柏舉爾愷錢塘張仙槎宗漢若西安駐防表冊則三原陳對峯名揚編輯米脂高幼農增秩錄寄福州駐防表冊則侯官陳邵亭雍錄寄者也同志匡益謹備書之歲在柔兆執徐虎林舊史氏識

辛亥殉難記卷首終

辛亥殉難記卷一

文職傳一

松總督傳

公諱松壽字鶴齡滿洲正白旗人以任子爲工部筆帖式累擢補郎中光緒十六年簡陝西督糧道二十一年擢山東按察使明年調江西按察使其秋超拜江西巡撫異數也二十六年調撫江蘇明年調撫河南二十八年召爲工部侍郎正藍旗蒙古副都統尋授熱河都統又召還授工部尙書明年復出爲察哈爾都統三十三年授閩浙總督兼署福州將軍越宣統三年九月而有福州兵變之事先是鄂湘江浙相踵叛亂閩軍被煽惑將舉事使人說駐防營釋械歸順將軍樸壽拒之遂決戰旗兵初獲勝繼乃大挫將軍被執公憤甚吞金死之省城無奏報京旗都統訥勒赫奏聞詔旨悼惜贈太子少保賞給二等輕車都尉世職照總督陣亡例從優賜卹加恩予諡子光裕以郎中補用光耀以道員用尋予諡忠節

舊史氏曰辛亥之變各行省大吏或走或叛其死封疆者惟公與晉撫陸公二人而已公居官無赫赫名而律已廉臨下寬危難中從容就義使天下尙知有廉恥之存功不尤偉歟

端總督傳 端緒 劉燧 赫成額

公諱端方字午橋號匱齋姓託和洛氏滿洲正白旗人廕生用主事遷工部員外郎中光緒八年舉人丁父憂逾年復遭母喪哀毀柴立山東巡撫張勳果公聞其才特疏薦 命發山東辭不赴服除補官充張家口監督擢本部郎中二十四年 記名御史 簡直隸霸昌道京師創設農工商局 賞三品卿銜開缺回京筦局務未幾 簡陝西按察使二十五年護理陝西巡撫補陝西布政使署巡撫如故調河南布政使未之任拳匪亂作晉豫釋驛公察幾先多爲文告反復曉譬俾士民毋惑境內晏然所作勸善歌上徹 天聽 兩宮西巡駐蹕幾年而七豎不驚者公之力也二十七年授湖北巡撫明年兼署湖廣總督三十年調江蘇巡撫尋署兩江總督移撫湖南銳意新政所至以興學爲急在湘遣出洋游學生尤衆賓禮耆碩調和新舊湘人士多頌之三十一年 詔赴東西洋各國攷察政治時所稱五大臣者也擢閩浙總督未之官與諸大臣分道浮海周歷各國八閱月而歸成書 奏進之是爲中國議改立憲政體之始宣統初元調直隸總督以事爲言者劾罷三年 命以候補侍郎督辦川漢粵漢鐵路事宜時郵傳部議以鐵路歸國有而收路章程蜀與湘異蜀人

大譁莠民乘之以作亂公至漢口 詔率師入川查辦尋罷蜀督 命公署理八月至重慶而鄂變作九月進次資州經郡縣輒召父老宣 朝廷德意解散資境匪徒數萬人蜀人頗感動而所部鄂軍陰懷反側十月初七日晡時兵官劉怡鳳率軍隊持械入室語不遜公嚴詞訶之遂迫公至旁小屋拘係之公終不屈遂被戕弟端錦同及於難叛軍函公首送武昌而州紳廖承瓌斂公與公弟忠骸謁葬州城外獅子洞明年鄂軍感公忠義迎公之喪至漢口歸元而改斂焉先是蜀督以公死事狀聞 上震悼加恩予諡贈太子太保賞給二等輕車都尉世職照總督陣亡例從優賜卹子外務部參事繼先以四品京堂候補陶磐以主事用尋 予諡忠敏端錦字叔綱河南候補知府嘗赴日本及歐美各國攷察路政著日本鐵路紀要一卷辛亥秋從忠敏入蜀資州之變叛兵揮之去君不忍其兄之死以身蔽刃冒叛兵無良叛兵又殺之事聞 命照三品官陣亡例從優賜卹並加恩予諡尋 予諡忠惠從忠敏入蜀者轉餉官劉燧爲叛兵所劫投井死赫成額荊州駐防舉人游擢都司被裔不屈投水死

舊史氏曰公性豪邁不拘小節篤嗜金石書畫海內孤本精拓宋元明以來名蹟聞風縱萃

悉歸儲藏豐碑斷碣致京邸度廊廡幾滿尤好客建節江鄂開閣延賓文酒之會無虛日
遭時承平亦阮太傅畢尙書之流風也晚丁机隍兵威不揚肘腋之間皆爲寇仇忼懷捐軀
有弟同殉赫赫雙忠遂與顏平原兄弟千古爭烈矣


趙總督傳

公諱爾豐字季和漢軍正藍旗人初以鹽大使官廣東改知縣補山西靜樂縣擢河東監製同知尋以道員注選從熱河都統錫公良至灤陽錫爲蜀督疏薦其才署永甯道以治盜名尋補建昌道廉公有威夷漢舊服瞻對土司夙爲邊患總督鹿文端公請改土歸流會戰失利將軍恭壽譏之鹿公用是罷土司益玩視無所憚其錯於察木多巴塘裏塘間者曰三崖曰桑披曰蓋綸察木多之南間於西藏南印度者曰波密皆倚嶮僻恣剽掠不受轄治光緒三十一年駐藏幫辦大臣鳳全爲巴塘土司及丁林寺喇嘛所戕據地叛錫公疏請以公率師會提督馬維祺往討之關外無穀俗食糌粑非兵士所習爰起雅州達裏塘置糧臺五轉般軍食足支三月糧始進兵遂克巴塘火丁林寺殲堪布土司伏誅爐城以西舊設文武官弁類聞昔謹愿者無所設斂計歲月覲內調黠者因緣爲奸黷貨漁色爲蠻民輕因條議上總督請廢土司改設流官明年春進規桑披圍攻十旬會大風雪軍乏食日餽糜與士卒共饑餒軍心感奮穿隧進桑逆亦穿隧來攻公陟高嶺周視得水源獲匪訊知寺無泉賴此汲飲掘其源守以兵遂作長圍斷接濟寺衆不得水渴死無算普中札娃自縊衆焚寺而潰俘

六百人戮其渠三餘悉有之桑披既克羣蠻震驚瓦述讓用命供烏拉乃爲定屢募之值毋令苦役蠻民大驢饋餼相屬瓦述介德格巴裏塘之間事游牧逐水草居處瓦述者譯言牛毛帳棚也捷聞 賞侍郎銜充川滇邊務大臣會錫公移任去 詔護理總督加尙書銜於是遙策邊事治道塗建旅舍招墾牧徠商賈次第畢舉三十四年公兄爾巽來督蜀公始專任邊事平三崖服蓋輸收德格瞻對玉樹數千里之地置郡縣設學校盡革土司酋長苛政更簡勁旅收服波密杜強隣覬覦其盡瘁川邊者如此宣統三年春 詔署蜀督夏六月鐵路國有之 旨下蜀人抗之成都罷市用文告曉譬不聽蜀紳與總督爭持急公遽收紳士十一人全城騷動旁郡縣響應立同志軍名號屠集城外數萬人城內亂民應之閩督署勢洶洶衛隊發槍殪數十人衆少卻七月十五六日事也公馳奏略言兵民相格拒互有傷亡獲槍械無算旗幟書保路會近省各州縣皆期約削木籤號召所捕獲多鄉愚隨訊省釋令歸勸鄉里毋蹈罪戾先是 朝命侍郎端方入蜀查辦至是 命署蜀督未至而武昌亂作端公駐重慶奏請釋拘留諸紳劾蜀官吏之操切者未幾成都亂端公遇害資州公集巡防隊三營爲鎮懾計統領田某頗忠實蜀人憚之官紳之黠者日夕覬覦用危詞恫喝內不自

安遠授權諮議局紳解印將去蜀而仇之者媒孽不已十一月初五日被執至皇城挫辱之
憤詈不屈遂見害

舊史氏曰蜀民輕僥易動難戢生齒繁貧民無所藉輒糾合爲誑辛亥之變假路事發難浸
淫至於大亂搶攘四三年亂靡有定豈蜀之屣運固未已歟措注失當讐言焚聽持之不堅
慘罹橫暴悲夫獨其先戡定川邊功蜀人到今稱之詳著其治邊事俾後之攷土司沿革者
有所鏡焉



陸巡撫傳 字光顯 協統 振德 管帶 熊國斌

公諱鍾琦字申甫姓陸氏世爲蕭山望族曾祖潑南祖保三游京師入籍宛平遂爲順天宛平人父春榮績學不遇以授讀終其身盛伯希祭酒其弟子也公少幼學補縣學生同治十二年拔貢光緒十一年舉人十五年進士改庶吉士散館授編修充 國史館纂修翰林院協辦院事奏辦院事功臣館纂修提調本衙門撰文二十九年 簡江蘇糧儲道三十四年擢江西按察使未之任調湖南按察使宣統元年擢江蘇布政使三年授山西巡撫到官三月而武昌亂作秦軍響應風聲達太原公束新軍嚴至是調兩營赴南路設防九月初七夜發餉械將以翌日啟行初八日黎明新軍變突入巡撫署公出堂皇將以大義曉譬之至則一僕已橫尸於堂公叱曰爾輩乃反耶語未竟遽中槍仆子光熙聞變奔出護父亦中槍死之叛軍入內室夫人唐氏抱雛孫起而槍聲四作遽中彈未幾亦死事聞 上軫悼加恩予諡照總督例賜卹又 詔曰已故山西巡撫陸鍾琦忠誠報國臨難捐軀妻唐氏同時殉難子光熙救父被戕忠孝節義萃於一門其子二等輕車都尉世職陸唐氏予旌表光熙追贈三品京堂照二品京卿陣亡例從優賜卹加恩予諡尋 賜鍾琦諡文烈光熙諡文

節公事父以孝聞年逾五十出告反面每事必稱父命而行初京察一等 記名公以父老
自陳願供京職父喪服除後數年復列一等始就外除公嫉惡嚴與齊輩論事少不合輒盛
氣爭之官撫甯訓導日佐知縣散賑周歷窮鄉策馬行山谷間徑路險絕風雨泥淖中不恤
瘁也從徐相國桐辨直隸災賑相國亟賞之管八旗官學有年公持大體不爲唯阿庚子拳
匪起京師相國惑焉公獨持異議相國弗能用也聯軍入京師 兩宮西幸公聞信闔戶
自經其庶母至解纜抹之慰之曰城雖破 皇上固無恙盍留此身報國可乎公涕泣勉
從之其督蘇漕以伉直忤倉場意提刑湖南察吏嚴定州縣結案功過章程月計勘案若干
及鞫訊狀限期報司絲是獄鮮淹滯如獨宿疴東安雷發蟬以辦學堂爲衆所嫉羣毆死之
邑生文炳奎主謀也讞員某欲脫炳奎罪公曰辦學爲地方官所許卽稍操切無死理炳奎
故健訟起意致發蟬死兇手旣獲衆供僉同炳奎惡得無罪卒雪發蟬冤論炳奎罪如律巴
陵楊林所與十甲爭洲而鬪死傷無算京控積數歲未定讞株累百數十人公親督研訊得
當日縱兵發槍之哨官李某論抵獄遂定擢江蘇布政使新政繁歲入不足單心鉤稽猶有
端緒而擢晉撫以去君之去湘也來別余置酒劇談君忼慨曰吾才短性下急他日脫遇變

故將不得其死耳後卒踐其言光熙字亮臣光緒三十年進士留學日本陸軍畢業歸授編修宣統三年升侍講才器深偉論者惜之新軍協統譚振德管帶熊國斌皆以不屈死公僕役馬八牛萬春李升以護公死並奉 旨褒卹有差

舊史氏曰明季蔡忠襄撫山西死難傳徵君作傳言忠襄之愚非有用才全氏祖望論之曰忠襄卽不克以保晉爲功而克以一死示晉人綱常之義卽功也忠襄豈敢以死爲功在論者不可以其盡瘁危疆爲無功也文烈才略或未足應變論者詎爲激變憤事而不許其忠過矣以全氏之說例之情事雖不同其志節皎然豈不足以揚國光而詔百世哉

馮巡撫傳

公諱汝駉字星巖河南祥符人光緒八年舉人九年成進士改翰林院庶吉士散館用主事分戶部以才諳稱充軍機章京循資遷員外郎郎中二十四年京察一等授四川順慶知府丁母憂服除授山東青州知府二十八年調直隸大名知府三十一年遷湖北鹽法道明年調安徽徽甯池太道尋擢甘肅按察使未幾授陝西布政使擢浙江巡撫三十四年改撫江西公性明敏表裏洞達朝議方厲行新政公所至察民情量財力從容設餉不競不隸士民安之武昌亂作下游大震九江當其衝新軍變南昌繼之吳介璋禱公爲都督號獨立公峻拒之然贛人故感公遂送公出至九江馬毓寶遮留之毓寶者新軍標統駐潯陽擁兵自雄將不利於公公自念去官守冀出求援師圖恢復中道爲武人所掘不得遂一夕遽仰藥死事聞詔旨軫惜加恩予諡照總督例優卹子邁以郎中用遵以主事用尋予諡忠愍舊吏氏曰公不死於官而死於去官之後論者多惜之張美翊曰公之志將有所待以爲補揀計所謂權也志不遂而死其心苦矣忍苛論哉美翊又言公治行多可稱述述其大者俾後之人哀其志云

世布政傳

公諱世增字益三姓祖氏口世祖大壽 國初從龍入關隸正白旗漢軍祖伊綿阿以勳奮起家累官陝西漢中直隸大名總兵官父長起陝西隴州知州公年二十七補旗學生員入同文館肄業六年盡通法文充法文副教習光緒十五年隨出使英法義比大臣薛福成充繙譯官以縣丞薦擢同知比還充總理衙門繙譯官十三年送學生至法使法大臣慶常留充參贊二十四年使俄大臣楊儒奏調赴俄繼楊者爲胡維德疏稱其才以道員交軍機處存記加布政使銜譯西藏全圖西伯利亞鐵路圖上呈 乙覽奉 詔嘉許三十年丁母憂歸繼丁父憂浙撫奏調充洋務局總辦巡撫張曾敷再論薦 簡甯紹台道請終制開缺服除外務部奏調在丞參上行走三十三年 簡山東兗沂曹道擢雲南按察使明年調雲南交涉使宣統二年擢雲南布政使三年七月調甘肅布政使未行而難作武漢之初發難也新簡滇藩以道梗不至而省城空虛新軍旦夕且變總督倚二三少年不設備公諫不聽幕客請速交替可脫險公以藩司有守土責義不當苟免謝之事亟商民洵懼法領事章禮敦來謁勸移入領事館又謝之家人有慰者公曰人孰無恥焉有一省大吏不能保護外人轉

求庇外人者余得死命也揮眷屬出避幕客家而抱印獨處僕紀祥不肯去日侍左右以迄其死故紀祥言死狀獨詳兵變之夕公懷印徒步出紀祥從謁總督拒不見乃歸闔戶出手槍欲自擊紀祥奪之恚曰汝誤我俄而城中鼎沸軍隊突入挾以走問何之曰制臺已亡去省城無主請移駐諮議局公不可衆擁之入講武堂守以兵索金助餉公曰庫款檔案具在吾豈有私耶章禮敦聞公被拘來視且語衆曰世方伯好官汝輩胡不知吾姑代任軍餉二萬明日當送方伯至余館衆舉手謝置酒款之章禮敦去衆曰吾屬無相害意詰朝送公行矣夜半槍聲作有楊某馳入告守兵曰世方伯電請大兵至矣速殺之叩寢門急公起出問故衆譁曰請方伯爲都督耳曰我藩司不能保滇土罪當死必強我有死而已衆以槍擬之公曰欲殺我乎請速殺衆列階下發排槍自額至腰腹受五彈遂仆紀祥伏尸號曰主人爲王事死我當殉主人汝輩速擊我有識之者曰此方伯義僕也免之紀祥乃爲整冠履市薄糗以斂厝土地祠浹辰公弟世崇至易棺改斂眷屬避幕客家者爲亂兵偵劫轉徙民間賴章禮敦拊之間關北歸本旗首領以死狀上於 朝奉 旨加恩予諡追贈巡撫照巡撫陣亡例從優賜卹子祖英以員外郎用尋 予諡忠愍明年春世崇與紀祥奉喪還葬京師方

亂熾時世崇與其女爲亂軍所得傷臂及足僕婦郭以救護主人被戕死
舊史氏曰公在浙辦外交善操縱遇事多持正性儉約不飾輿馬衣服官滇三稔法領事服
其誠旣改官矣智巧者處之何至死百折不回甘死如飴其積誠使然哉

張提法傳

公諱毅字仁府一字壬父直隸天津人廕生官部曹後以道員分山西奏調至陝西巡撫疏薦簡甘肅甘涼道宣統三年六月擢安徽提法使八月自隴入秦將之京師九月至乾州會叛軍起道梗止逆旅叛軍偵知之陝將張雲山請公爲參謀官公斥之搜衆怒羈留不得脫會疾作州人知公賢有言於軍中者乃出就醫公自度惟死可自完十一月初十日夜加丑乘間投井中死州紳民識與不識咸哭失聲集資爲斂公年四十七二子皆幼明年秋僚友釀金乃歸葬於其鄉

舊史氏曰公父夢元官福建布政使護撫臺灣以清廉著聲其卒也 詔贈官銜公直諒有父風他行事不少槩見獨其死節爲難能既無官守中道遘變疑可以無死而竟死可謂無愧君親矣

羅參贊傳

君諱長禱字申田湖南湘鄉人光緒二十一年進士改庶吉士散館授編修捐升道員發江蘇旋改四川趙爾豐督川邊軍事君在兵間飛書草檄聲績著聞宣統二年簡駐藏左參贊駐藏大臣聯豫以兵備處任之會新調川軍至君出簡閱礮隊營大譟君白大臣大臣怒鞭管帶官而易之協統鍾穎銜之鍾穎報川軍入藏費用六十餘萬君覈其浮冒汰二十餘萬鍾穎益怒三年五月鍾穎率師征波密累戰輒挫大臣以君代之馳往奪其軍得鍾穎失機狀方激厲軍士規進取而川軍太半會黨氣囂甚君馭將士嚴及秋聞內地亂川軍駐藏者遽譁變掠君私宅君在波密未之聞也已而波密軍隊變絜君使服役偶得脫自投崖下兵曳之起臂折益挫辱不可堪憤甚痛嘗遂見害一妾挈幼子逃匿蠻丐家不知所終舊史氏曰君性卞急不諧於族人以辦學堂故橫斂君私財君以書抵余語激切余下湘鄉令爲亭平之不數年而君死萬里外矣君之死鍾穎實陰嗾之其家人赴愬京師鞠得實乃實鍾穎於法

王兵備傳

君諱毓江字襟山安徽宿州人父心忠以行伍起家勦撚匪有功皖撫英翰疏薦累官江南總兵官君少有材略軀幹雄偉耐勞苦以知縣官江蘇復以道員改發陝西君故將家子習兵事充兵備處總辦布政使余誠格擢湘撫檄調湖南筦兵備處事長沙變被執罵不絕口爲亂兵所戕到湘纔九日耳

王兵備傳

君諱振畿字化東山東滕縣人天津武備學堂畢業生初充哨長累擢至統領尋改道員入滇爲兵備處總辦研精武學治軍有節制辛亥九月十三日省城兵變被執不屈死先是新軍七十三標起北校場自北門斬關入踞電局攻軍械局及官署翌日七十四標繼之礮營馬隊並起奪東南兩城而七十三標據五華山攻督署總督依違未決君諱抗拒不少屈遂見害事聞奉 旨照協都統陣亡例從優 賜卹

劉兵備傳

君諱錫祺直隸人湖北候補道有幹略充陸軍第八鎮正參謀官以勞加正參領銜辛亥八月武昌兵變錫祺不說隨遂被戕事聞 詔追贈協都統照協都統例從優 賜卹

桂知府傳

君諱桂蔭字積五又字莠庭滿洲鐵藍旗文生以內閣中書充軍機章京擢刑部郎中 簡湖北施南知府攝宜昌移攝安陸所至士民皆親之安陸襄樊門戶也宣統三年八月民軍變府城故無兵君與鍾祥知縣田芸生招集團防請兵於襄陽道喜源撥操防馬步五營至劉文玉領之城外水師十九艘黃某領之君與芸生謀守禦恒申且不寐德安荊州先後陷劉英據天門相距百里而強或勸君自爲計君曰吾與城爲存亡脫不幸吾自有所適地也十月文玉以操防四十人出哨遇武昌逃兵於潛江遽駭走喜源遣鄖陽陸軍百人至管帶張楚材排長白星垣久蓄異志君偵知之厚其餉糈冀可恩義結也十一月五日諸軍官會於縣署楚材陰使陸軍圍府署槍聲作文玉黃某皆驚愕楚材遽起曰操防兵變統領速出鎮撫之文玉色沮倉皇出見發槍者皆張白所部陸軍也趨北門斬關出水師亦上駛奔襄陽楚材星垣走府署收印信趣君去君與妻吉喇氏趨入文廟崇聖殿自縊死年五十六吉喇氏年三十八事聞 贈道員照道員例從優賜卹安陸士紳黃芝齡等感君殉義爲營葬樹石識之君子柏壽來啟竊歸葬芝齡乃葺治爲衣冠墓其得士民如此

存知府傳

君諱存厚字寬甫滿洲正白旗監生由內務府郎中選湖北宜昌知府到官歲餘以疾去久之再選宜昌先後移攝漢陽黃州德安安陸知府光緒三十三年調督銷沙市川鹽宣統二年筦襄陽張家灣權局三年秋武昌新軍變君募勇丁四十人爲衛襄陽道喜源借南陽練軍二營至人心稍安十月初旬民軍迫竄陽襄郡危喜源假巡邊名去而縣人張國荃自老河口招集土匪據城叛稽查長傳登甫者遽張白幟於局門君揮家人避紳士莊姓所曰吾嗣倘不絕死無憾矣民軍至攫局中金勇丁亦爭索金金盡乃縛以獻王開典者夙無賴嗾衆擁君至北門外校場遂被害幼子纔三齡民軍挾之上馬疾馳驚悸死郡人士史慶雲章曉齋斂君而殯之越三年乃歸葬薊州

來知府傳

君諱來秀字樂三滿洲鑲藍旗人繙譯生員官部曹充軍機章京 簡福建汀州知府宣統三年十月福州變起汀州士紳勸君交印於自治公所許護之走汕頭君謝曰印乃朝廷授我弗能予也遽服毒死十月十六日也先一日君以金屬幕客錢某送其孥錢某挾金遁妻子流離無所歸山陰章子肯游詔安與君善釀貲護其眷屬北還子肯歸以告族人章錫光錫光書來述其狀云

石知府傳

君諱家銘字訂西湘潭人以刑名游滇佐大府幕尋以縣丞候補累擢至知府宣統元年補昭通府三年移攝澂江尋改開化清理積獄士民頌之九月十五夜開化兵變先是省城電調總兵夏文炳率防軍赴援君夜馳至文炳營議以駐城兩營往別募團兵爲守城計質明還書諭帖百紙通告各團而關道龔心湛電至抽調防營君與文炳謀令周天長李家祐各募一營分守要隘金殿舉余樹松別募土著守府城紳團來城求勿抽調者踵相接文炳率四十人以行規至蒙自定進止已而蒙自電阻君懼蒙自變則十餘營餉源絕馳書趣文炳歸相與畫籌餉策文山知縣劉臣堯曰吾從蒙自來聞關道方發開化防餉請委員迎提便於是命殿舉往而城內獨倚樹松樹松所募初成軍請點驗發械文炳不至君獨往夜詣文炳議防守比還得臣堯書言城外居民洶懼多徙入城君與紳士萬里恩出巡城夜半樹松卒至曰事急矣若輩變吾將出隊語畢遽反走俄槍聲四起圍府署署中僅保衛隊二十名槍枝二十彈三千君督礮發槍相持翌日日加辰哨官李桂清曰子彈盡矣外無援兵奈何君夙自矢與城存亡密弄阿芙蓉膏聞桂清言遽吞之猶走安平舊署就樹松語有告者曰

余某固親率叛衆者也衆毀府署左右垣入大掠君在安平署已昏瞶家人負之還遂卒年五十後樹松爲蔡鏐逮治亦殺之

毛知府傳 管帶官羅某

毛汝霖字澤卿四川成都人雲南候補知州宣統三年權永昌府釐金知府宋聯奎擢迪西道去保山知縣陳文燦護理知府君兼攝縣事文燦有事於騰越君又代行知府事九月初六日騰越兵變永昌民大恐君集民團爲守禦計十二日夜方午昆明電傳省城亂君知事不可爲遽仰藥死遺書一紙曰恢復故土固所願所恨王羅二營官不相能將爲地方患耳王桂清者性陰鷲與羅某並充新軍管帶官積隙相仇民軍入城羅不屈被害碎其尸惜名字貫履皆不詳

陳知府傳 弟同知兼詩 職官陳順興劉占魁

君諱政詩字詠笙順天人原籍浙江先世有官陝西者遂家漢中幼隨父湖南年十九從湘軍西征將軍穆圖善器之從將軍至奉天充防營統領光緒元年以知縣發山西歷署陽城平遙天鎮應州權薩拉廳同知兼統防營所至以廉惠稱口外後套匪亂巡撫張曾啟令率師剿平之擢知府以道員用張移撫浙江奏調入浙統嘉湖水陸防軍後撫浙者中讒劾罷之宣統元年巡撫增韜疏言政詩被劾誣枉昔官奉天見政詩軍紀嚴有廉將風聲色貨利舉無足動其心 詔復原官再至晉三年爲南路巡防隊幫統兼領步隊駐澤州九月秦軍變晉撫陸鍾琦令增募兵隊扼河守太原新軍變陸公殉節變軍南趨君駐聞喜隘口鎮敵攻隘口擊敗之劉漢臣殲焉再戰再敗之是役也敵千餘人所至招集土匪亦千餘人君以三百人破之方乘勝進攻有學生數輩自省城來謂有 詔命停戰乃駐師絳州變軍句結陝境刀匪州境莠民潛通絳紳之不肖者勢復張平陽被兵運城陷有勸去者叱曰吾奉上官命守南路若棄絳是南路無乾淨土矣必死守十一月二十日敵逼絳君嬰城守而絳紳已開門延敵君督所部巷戰力不支被執罵不絕口生剖其心鬻割以死同被縶者弟敷詩

隊官陳順興劉占魁僕一人君語衆曰茲事我一人責於若輩何尤僕則傭工耳宜並釋之
乃釋僕而敷詩順興占魁皆及於難踰月所部營官某自澤州至收其忠骸而君之元猶赫
然懸州門州牧某宛轉言於軍隊始歸元而斂之君無子弟效詩歸其喪葬漢中府郭外敷
詩山西候補同知隨營治文牘者也

張知府傳

君諱振德字

人廣西候補知府充潯防隊統領辛亥十月潯州亂君率師至

黃茅規進剿而匪黨勾結大湟江口巡勇乘機叛振德馳還入營猝被狙擊中槍殞巡撫沈秉堃疏聞 詔贈三品銜給雲騎尉世職

張知府傳

君諱曾疇字望岷江蘇無錫人湖北候補知府滙漢陽車站貨捐漢口戰事起避徙上海有仇之者謂其挾贊道也至滬迫使行曰歸理款目而已比至漢口會計出入悉符合仇者猶苛索君抗辯無所屈乃得還有黨人同舟者面辱之粹其冠君憤恚遽自沈於江時舟行過武穴也

辛亥殉難記卷二

文職傳二

沈同知傳

君諱瀛字士登江蘇吳縣人生有至性嘗割臂療母疾從舅氏謝楨至湖南以湘漕海運勞保知縣中東戰事起湘撫吳大澂請出關率師而北道員薛鴻年繞轉運檄君自隨駐臨榆涉勞苦艱險事輒奮起請行或軍中有所採購他人競趨以爲利者則退讓不與鴻年益重之踰年還湘賑醴陵水災無濫無漏累攝武陵長沙所至有聲擢古丈坪同知未之官留筦官錢局草創章程一出君手條理縝密後至者不得因緣爲奸再攝長沙兼官錢局如故尋移攝衡山宣統二年春長沙亂民以米貴闕於市媿巡撫署市廛盡閉長沙善化二縣令皆罷斥君前已奏擢知府至是再攝長沙士民聞君至則大悅君緝治亂魁平糶施賑省城復安巡撫楊文鼎奏聞得旨嘉獎三年八月巡撫余誠格檄充營務處提調鄂亂作湘人應之先是黨人多匿迹會城君設方略言於大吏謂可名捕也九月初一日新軍變突入城巡防隊統帶黃忠浩被戕一城鼎沸君方出巡市軍隊遽遮要入諮議局請爲長沙知府不可請仍爲長沙知縣不可旣而語益不協君怒曰若撫軍用吾言何至有今日於是閉置室中

竟日前攝湘鄉知縣申錫綬亦被拘忍飢相對以死節相勉黨人知不可屈擁之出君罵不絕口遽見殺

舊史氏曰余兩至長沙習沈君明練吏事不爲唯阿臨難抗節彼建牙擁彘者對之有媿色矣薛兵備嘗道其相從出關事類硜硜有守者士非操行不苟焉能見危授命若是哉

陸同知傳 子文治 某某

君諱敘釗字磐芝順天大興人原籍浙江蕭山少厲志節從軍西寧得知縣從左文襄司轉運有功曾忠襄撫山西招入幕尋筦皖軍轉運擢直隸州歷知應州諸州縣凡十二並著聲績官靈邱十年尤得民拳匪偏晉邊大治鄉團先事設防縣境晏然鞠長治教案五龍山松產案執理判決外人無異辭高平之抽畝捐也永寧之權柿稅也民苦煩苛挾衆而諱君馳往撫慰衆皆曰好官來吾屬奚敢抗事遂解猗氏會匪裔平民爲亂禽治其渠株累者悉遣之宣統初元以卓異薦明年補河東監掣同知三年九月太原亂作巡撫陸公死之河東戒嚴君奉檄治團練守運城先是以疏濬鹽池盛暑督役致疾比籌軍事日夕不得休疾甚猶起視事秦軍越境來襲十一月十三日與晉劄兵合薄運城城陷君預吞阿夫容膏衣冠出堂皇厲聲訶之攢刃下無完膚遂卒長子文治自裕州來省視君趨之還中道聞變大慟昏絕復蘇卒不起疾革時連呼殺賊而瞑幼子某爲亂兵所戕

舊史氏曰君隨父官晉陽君兄鏞余姑之女夫也同治初余客太原數見君別四十四年而君爲循吏爲國殤矣初聞君死事狀又得顧家相所撰傳父死忠子死孝與文烈鄉里同氏

族同死難情事略同嗚呼亦奇烈矣哉

勞知縣傳

君諱謙光字佩蘭山東陽信人少習舉業壯而有用世志入北洋武備學堂畢業試高等山西設武備學堂應聘爲教習尋管帶馬隊營入貲爲知縣遂官於晉晉故樸僅新政創始君提倡之力爲多若督練處若警察學堂並充提調官規畫井井以勞薦補缺後用直隸州居數歲移充北洋常備軍第三鎮參謀官兼軍需官擢第六鎮工程營管帶官勳訓練明賞罰軍士誠服統術日益精武漢變起率工程營赴前敵築橋漢水上將以濟師敵爭之力敵子兩下君躬督周視不少卻猝中敵死十月某日也年四十七君亡而橋卒成師得渡漢遂克漢陽論者尤痛惜之君篤風義同里曾筱峰奉母依君太原母歿旅殯不得歸筱峰復從君天津遘危疾執君手語曰吾母未歸葬吾死不瞑矣君慨然自任卒使人求曾母殯所與筱峰之匱歸而葬之擇其族人子爲之後陽信人至今嘖嘖稱君高義云

舊史氏曰吾友勞京卿乃宣故山左籍比歲居曲阜以所撰謙光家傳來吾讀之而悲不獨悲謙光也漢陽告捷武昌垂下忍而奔之何心哉功雖不成而君千古矣嗚呼勞氏之光國家之巨痛哉

楊知縣傳

君諱調元字孝煥號蘇甫又號仲和貴州貴筑人同治九年舉人光緒十三年進士戶部學
習主事丁父棉竹君憂服除以母老不赴官終母喪乃入都改知縣選陝西紫陽以治蜀匪
著聞調長安更歷華州咸陽富平寶雞諸州縣皆有聲宣統三年正月攝渭南方銳意爲治
及秋而亂作武昌新軍變秦軍應之省城亂旁郡縣守令多委去者君忼慨曰吾守土官知
保民耳集士紳議城守渭南北多刀客平居拍張殺人尋仇願能約敕其黨不甚爲暴聞君
言大感動爭來自效願誓死衛桑梓數日集萬餘人武進士韓有書者夙爲諸刀客敬憚君
檄有書領其軍部署犄角定鄰匪乘機掠縣境有書擊走之臨潼武生張士原素無賴矯軍令
以兵至號曰宣諭君聞城拒之則大譟將攻城君登陴語士原曰若果弗傷吾百姓者當釋
兵入吾推誠與若從容言之士原許諾釋兵率其衆入具言省城餉絀議賦捐於民君持不
可而自出俸金五千畀士原曰吾不能以累吾百姓也士原怒語不遜君曰吾 朝廷守土
吏義當與城存亡委曲爲此者冀百姓無被兵耳不能有死而已投署後井死之九月十一
日也士民聞君死則大憤羣奔縣解執士原而磔之殺自號副統領錢鼎及從者數十人有

書與士民葬君於縣東門外畢家原君洪深經術譔述頗富詳咸陽李岳瑞所爲傳不具書
舊史氏曰往者自成都趨行在君攝寶雞縣事關中旱饑籌振撫婦孺言災狀憂形於
色余悚然敬之君仁於民者也委曲遷就以求紓目前之既誠出於愛民之一心事不可爲
卒以身殉無求生以害仁君庶幾知道者歟

楊知縣傳

君諱宜瀚字吟海四川成都人光緒十七年舉人官西陲興平寶雞諸縣以經術飾吏事與楊調元齊名宣統三年十月攝華州知州民軍起圍縣署索銀錢以威脅之君憤甚仰藥死

彭知縣傳 子蘇年

君諱毓嵩字鏡孫號豫民四川宜賓人光緒二十年舉人官洪雅縣學教諭學行修飭有治事才學政疏薦送部引見得旨用知縣選陝西鳳翔到官未逾月以商民焚劫鹽局牽連里吏議解任去上官知其賢久之還治鳳翔勤於聽訟自午至夜分訊斷明允頌聲大作其於學校不偏重科學必令讀經搆設工藝勸民樹桑育蠶而禁煙獨嚴峻秦民狃故習頗怨之亂作莠民藉洩忿遂及於難鄂亂起陝右聞風響應西安新軍變郡縣土匪竄起駐鳳防軍赴援九月初七夜匪黨驟集數千人圍攻府城君與知府治團練籌剿禦而城中軍隊與匪合勢洶洶君自以朝廷命吏不可辱解束帶自經丁役趨入救之士民感君者爭來請引避匪猝至君從容出堂皇北向跪拜起語衆曰吾有死耳任爾等爲之匪擁君至公署西北神廟以白布纏其頸君怒詈遂被戕梟其首去九月初八日也年六十二子蘇年聞父遇害亟奔父死所未至匪衆逐之乃入民家投井中死年三十七

舊史氏曰君爲儒官獨留意民事性闊達與恆流異趨官秦中歲時通問願勉爲良吏報知己忽忽十稔歸栖海上乃聞君死節泣然流涕書之貴筑花金蔭客君所既護其喪還西安

以書來告曰當武漢亂作有勸君掛冠去者君笑曰人孰無死但貴得時耳匹夫不可奪志
諒哉

德知縣傳 子一人

君諱德銳滿州 旗人官秦中久歷宰長安三原諸縣政平訟理所至民愛之宣統三年九月西安兵變八旗人多被禍者兵突入君室君方與家人會食爭前語君曰公廉明得民心我曹不忍死公請速出城君曰感諸君意然余滿人也何忍視滿祀之斬諸君刃加余頸可也出城胡爲者遽起奪刀自刺死妻某氏子某亦自殺

黃知縣傳

君諱爲熊字子祥江西德化人父儒荃內閣中書母氏邢有學行君髫髻母授之讀年十四補縣學生隨父官京師丁母憂一慟幾絕中光緒十七年順天鄉試舉人大挑用知縣發浙江充發審洋務各局差以幹練稱攝於潛知縣扶危振懦不畏強禦知府某惡其強項譖於上官未滿任去再攝東陽民好訟積獄累千百排日決十數事懲誣告理冤滯民畏而感之遭繼母喪尋復遭父喪服除攝蘭谿地當衝要盜匪充斥治之踰年四境安堵益以暇日興學重農百廢具舉巡撫奏其治行傳 旨嘉獎宣統三年九月省城兵變君聞痛哭欲自殺明日又得僞電謂京師陷大慟曰主憂臣辱主辱臣死今何顏見地方人民耶紳民慰留之曰吾何忍棄城走惟辦一死耳俄而亂民麀集將奪縣印君諭之曰母害我人民此印受之於君吾當完全還之不能付若輩也抱印闔戶自經僚友趨撲解纜氣已絕面如生年四十一啟囊篋故書敝衣外無長物縣紳斂之厝蘭谿城外君無子一弟尙穉妻李氏猶流寓杭

州云

文知縣傳

君諱文海字雲舫漢軍鑲藍旗人少孤力學事母孝弱冠補八旗學生光緒丁酉選拔貢生以知縣發浙江入法政學堂畢業宣統元年攝長興二年丁母憂充勸業道商務科科長三年秋浙新軍變有逃勇僞作軍隊假搜軍械名徑入君寓得洋槍若干支將執之君發槍斃一人傷二人逃勇出報遂被收忼憤不屈軍隊舉槍擬之君怒曰丈夫死則死耳何以槍爲遂引頸受刃年四十二陽湖汪編修洵與君善述其死事狀如此

榮知縣傳 僕成松

君諱榮濬字心川一字橘仙荊州駐防蒙古鑲黃旗人光緒三十年進士用知縣發湖北省
墓還荊州時駐防營方設中學及方言工藝學堂當事者留之逾歲至武昌司督練公所文
案宣統三年補天門知縣奉檄先往攝事縣人有造君醜白金者辭曰贖也君謁總督未歸
其人留金去君歸亟命僕攜金還之戒勿復來其操行不苟如此天門民好訟思有以廓清
之未幾武昌變荆防旗人自武昌逸歸者道天門語省城兵變狀且爲君危君曰吾曹食
國家餉二百餘年當有以報矧吾有守土責能守守之不能則以身殉成仁取義在此時矣
集紳耆練民團爲保衛計而鍾祥匪首劉英率數百人來攻紳耆走避喜事者附和爲內應
城陷誓死不屈遂被戕僕成松殉焉

鍾知縣傳 何永清 鍾麟子某孫某

君諱鍾麟字書春蒙古正白旗人世居奉天光緒二十九年進士湖南卽用知縣補瀏陽瀏醴亂初定大吏以君朴訥不任繁劇移攝永順宣統二年移嘉禾壤地褊小而士紳染時習多囂競三年九月省城難作風聲達外郡縣無賴驟集闕縣署索金充餉君衣冠坐堂皇訶斥不可止俄而縱火自外達內君出佩刀自刎死方擾攘間君子某懼父受辱出乞於衆以首觸塔石頭腦破裂死妻某氏子婦某氏孫一僕婦一皆自經死一子一幼女爲僕人掖出得免同時死難者嘉禾縣典史何永清四川新津人

申知縣傳

君諱錫綬字印堂一字蔭棠陝西城固縣監生以知縣發湖南長於鞠獄凡督審發審兩局有巨獄多屬君初攝巴陵有能聲繼攝新化茶陵歸充長沙保甲總巡以微過撤罷按察使陸鍾琦清積獄知君才頗倚之宣統二年攝湘鄉時巡撫楊文鼎銳意清鄉以道員吳躍金與湘鄉紳蔣某總其事蔣任本邑人士頗驕恣與縣官咀晤尋謝事歸三年夏充兵備處差遣兼布政使署偵探員亂作軍隊擁君入諮議局與沈瀛俱閉寘一室竟日不得食日且莫家人具餽餼乘間饋君屏弗食瀛語君曰吾輩久羈此將何以爲計君曰丈夫死卽死耳奚暇他計瀛曰死則有名然則名固重於生乎君曰然既而軍隊趨二人出遂與瀛同死之年五十五

舊史氏曰申君不讀書朴訥少文臨難不苟免賢於世號爲通人者遠矣或謂彼黨所欲殺者爲勸業道王錫綬以名同誤殺君君不一申辯卒以死成名云

汪知縣傳

君諱承第字棟圃江蘇太倉人年二十補州學生家貧出游嘗佐湖北學政幕義甯陳公聞其賢自鄂杲至湘撫皆延充幕僚以知縣發四川漢陽令李某留止之助理積牘者月而畢事入蜀筦重慶香國寺唐家坨釐局寬以恤商商民感之以本生慈母周之喪呈請丁憂格於例上官未之許也君茹哀踰期乃出會甯遠邊夷亂運軍械往知府黃兆麟留辦阿什夷人剿撫事充營務處夷平攝大足縣川漢鐵路攤派租股民苦之請於大吏歲減萬餘金民困以紓其攝會理也滇中叛兵入州境集土兵禦之士兵久不受徵調君昔在甯遠著威信至是悉用命所向皆克其攝永川也川東多盜有公口者燒香結盟之秘密會也黨會滋蔓永川尤甚君徐察之得要領勸懲互施不戮一人而公口會解散出會中積儲爲地方自治費編練保甲羣盜屏跡既受代大吏以營務屬之鐵路國有事起官紳大阻晤環省城數十州縣結同志軍已而兵民交鬩雙流距成都近紳士氣囂甚君往攝縣事捕誅尤桀黠者人心少定未幾而省城亂郡縣響應土寇四起練壯勇策守禦而孤城無援寇至如麻出城走簇橋被困中槍死之辛亥十月二十日也年五十五紳民感君義斂之子曾源官直隸東光

縣典史聞關人蜀赴訴當專聞於 朝 追贈知府照知府陣亡例從優賜卹君性孝友篤
風義官大足時有友王某以負巨資縲獄出三千金代償得釋此在君爲小節云

徐知縣傳 僕一人失名

君諱昭益字謙侯浙江烏程人少隨父同甫游蜀治刑名家言佐嘉定府石砭廳幕蜀民好訟前官多留獄披卻導獄亭平而決之囹圄爲空以知縣官蜀權萬縣鹽釐鉅紆寬征商民頌之宣統三年四月攝威遠新政興文牘填委施設有序不爲煩苛爭路事起蜀人倡同志會川東西騷然土豪會匪假名義報私怨者蠶起或乘機剽掠爲說君集紳士議以保土保民爲己任會匪過縣境君率團丁數百人馳出城曉譬令解散抗不從鄉團起召募罕訓練猝戰遽敗潰君隨行一僕中槍死所乘馬受創斃退入城登陴而守飛書省城乞援師中途爲匪所得遽圍攻城中羅掘幾盡邑紳某夙銜君陰與匪通而僞以事請謁君持論侃侃不少屈某突出利刃刺君腹死之一僕某以身翼蔽亦被刺死君母年六十餘先期避地嘉定得免於難

舊史氏曰君妻弟吳厚卿余蜀學所取士走上海來述君死狀當蜀變時郡邑吏皆懾於同志會之虛聲守正不撓嬰城拒寇者鮮矣如君其可謂守死善道者歟

章知縣傳 章

君諱慶字勤生浙江會稽人篤於內行通經術兼治名法家言游蜀中歷就幕職總督錫良巡撫沈秉堃按察馮煦趙藩並器異之以知縣發四川充學務處科長補射洪移攝劍州又歷攝南部冕甯西昌蜀民生齒繁多失業勸蠶桑設工廠廣闢利源窮黎蘇息興水利築隄坊以備旱潦修文廟立學堂以振士風尤勤緝捕寇盜斂迹黎雅以西山谿岨深驛路險巖建鐵橋平道塗行旅稱便窩普支夷爲邊患君廉威所被濟以兵力野夷歸誠出被掠難民百數十人夷漢翕服薦擢道員在任候補西昌巖邑也盜熾甚已革保正張國征習太陽教惑衆斂財與裁缺千總黃義庫同惡相濟會爭路事起邛雅二州名山洪雅諸縣土寇乘機起國征義庫偵知甯遠軍隊移駐大渡河府城兵單遂與匪黨合謀作亂九月初四日薄暮殺傷德國教士羅尙德甘呢伯於德昌所護送軍士亦被創翌日黎明圍府城君督城團固守而城南有內應者匪黨破城入劫監獄團衆不能軍力竭戰敗死之兄子鏞被戕妻顏氏聞警奔赴爲匪斫傷僕從吏胥同時傷殞者二十餘人

馮知縣傳

君諱汝禎字萊雲號劬庵浙江桐鄉人以諸生入貲爲知縣發廣東明敏有幹局權商征讞疑獄咸舉其職以勞擢直隸州知州加運同銜賞戴花翎宣統三年七月攝西甯知縣廣州變起西甯亂黨糾土匪剽掠四境騷然君募團練百人出近郊以靖人心城內外務安九月二十二日縣紳附亂黨者率衆驟入縣署脅縣官速懸白旗示歸順君持不可俄而槍聲作君朝衣冠出大堂衆爭前槍刃交集洞胸穿脇斷右臂死之年四十長子樹榮肄業省城農校聞警馳至越三日始斂幼子樹華纔十一齡逃匿鄉民家以免

聯知縣傳

子寶焯

姪寶明

君諱聯森字植三蒙古鑲紅旗人荊州駐防光緒八年舉人大挑知縣發廣東以親老改湖北充荊州中學堂會計員尋權金口釐捐逾年調長江埠布捐局所至恤商宿弊咸革辛亥九月交替歸至漢陽遇亂軍爭前索金君慷慨罵賊遂遇害子寶焯兄子寶明從死

胡知縣傳

君諱國瑞字瓊笙湖南攸人光緒三十年舉人大挑知縣發雲南署霑益知州一月中理積獄踰百大吏以爲才歲計考曲靖八縣最量移彌勒二十八寨有劇盜三年易八令莫能治君至與營將謀曰請兵捕討彼得爲備出不意襲之可立禽也君戎服佩刀先行兵繼進乘夜破賊巢禽況國玉雷珍張朝安等誅之盜藪一空戊申大水獨賑並舉大吏以循績聞得旨嘉獎尋補江川擢大關廳同知敘勞以知府用先是君以疾乞休三請不許乃以修墓告既受代矣會聞變遣家屬行寓書其子庶華曰吾聞省垣不守方伯被戕餘無殉節者臣子之義萬古爲昭余雖無守土責然實官也俟北信當死以明吾志汝勿來發書後旬日訖傳京師破戒從者趨治裝明日沒者見井上雙履奔告從者往視之則屹立井中死矣年五十案上得遺書三背書二語曰自縊不死又復投井書中謂京師淪陷用以身殉雖達人所不取愚者終不失其爲愚於是縣吏楊宗熙買棺斂之明年夏庶華奉喪還攸彌勒士民請封其井題曰胡公井湘人旅滇者爲文表之而湘潭王闓運系之銘

張教授傳

君諱舜琴字竹軒雲南石屏州人光緒二年舉人四應禮部試不得志選昆明縣學訓導調太和擢順甯府學教授提學使葉爾愷調充學務議紳兼會計課課長省城亂作君聞提學吞金自盡大慟曰際此亂世吾輩又何生爲遂仰藥死宣統三年九月十五日也在昆明十八年課士嚴明敦尙名節士無不敬張先生者監育才經正兩書院兼女子師範校長滇士樸健甲午後稍稍習新圖書鄉人或詭怪君誘掖獎進之而整齊學規一準乎禮律已嚴一取予一噸笑不苟也邦人無新舊皆翕服外國教習亦僉曰張君正人正人事繼母孝迎養昆明學舍榜其堂曰不冷嘗助許君五塘刻滇詩重光集多蒐采遺佚分修雲南通志以直筆忤當事意謝去大吏疏薦請以知縣用部吏索賕君不予乃仍留教職自是遂絕意進取云君卒之歲年六十有五有子二前卒以弟之子倉耀嗣

舊史氏曰明桂王之亡也昆明諸生薛大觀死節時大臣親臣多不死獨一秀才死論者難之君冷官耳明大義爲滇人光視大觀無媿色焉袁樹穀曰自唐設廣文官千餘年以君爲結局惟君重廣文廣文亦遂以君重諒哉斯言

榮麟德祐寶坪廣啟嚴濟陳問紳張存善傳

榮麟字仲文滿洲 旗人光緒十四年舉人陝西候補道辛亥九月兵變方權白河釐金

全家投井中死

宗室德祐字受之滿洲正藍旗人宣統三年選授陝西鳳翔知府明年移攝漢中新軍變脅從不屈死二子某某同時被害

寶坪字子鈞西安駐防 旗人陝西候補直隸州知州一門殉節者七人惜不能詳其名

氏

廣啟字少漁滿洲 旗人陝西候補同知兵變走避入鄉卒遇害

嚴濟字寬甫滿洲 旗人陝西候補通判在省城殉難

陳問紳字子仲湖北人陝西白水縣知縣城陷遇害

張存善字次章陝西候補知州權鳳翔高崖鹽釐兵變遇害妻某氏同殉焉

齊世名奎彰世泰王文域傳

齊世名字壽農直隸天津人山西候補知府攝陶林廳同知辛亥九月兵變被脅不屈遂遇害

奎彰滿洲 旗人山西岢嵐州知州兵變被戕

世泰滿洲鑲黃旗人山西天鎮縣知縣大同兵變被戕

王文域字伯若四川人山東樂安縣知縣辛亥之冬爲亂兵所戕聞死狀甚慘烈而談者不

詳

劉念茲王榮綬傳

劉念茲湖北鍾祥人初爲校官後注選得福建永安知縣宣統三年秋民軍變起抗拒不屈被繫於豚柵以佩刀自刎死

王榮綬湖南善化人福建連江知縣辛亥十月兵變遇害

舒志琦璘文某傳

舒志廣西南寧知府宣統三年方攝思恩知府兵變死之

琦璘滿洲鐵紅旗人貢生官雲南順寧知府兵變遂及於難

文某字晉巖湖南人四川候補知縣辛亥兵變殉難

錫縣丞傳

君諱錫楨字榦臣姓汪氏漢軍 旗人祖恩授官湖南同知工詩善畫父某亦官於湘遂家焉錫楨以縣丞發湖北入仕學院畢業優等宣統三年充沙市警察官荊州亂作盡室殲焉

程巡檢傳

君諱彬字筱竹江西樂平人湖北候補巡檢充警務公所游民習藝所所長宣統三年六月兼署鮎魚司巡檢八月十九夜新軍變馬隊輜重各營乘夜入中和門君方出巡弓兵二人從遇叛軍問騎馬者誰也君曰我司官也出彈壓保百姓語未已槍發遽墜馬死弓兵逸歸家人奔視尸尙溫目張視面如生明年三月其子濟雲葬之江夏東門外洪山之陽

方巡檢傳

君諱祖楨安徽桐城人湖北嘉魚縣解州司巡檢治盜竊禁煙賭以嚴峻稱羣不逞憾之武昌革軍起君趨縣城與知縣議城守而紳士陳才順留之不果行田某者鄂軍頭目將入湘道解州所部有解州土豪某夙銜君因誣君漢奸曠田殺之君聞變匿菜圃中大索未獲田執陳才順責交君刃加頸陳終不言獲君妾乃得之還殺之於江岸田納妾攫財物去方橫尸江干盜數輩以足蹴其顛爲戲越數日里正始斂之葬於江隄之旁

王巡檢傳

君諱萃，至江西豐城人。湖北穀城縣石花街巡檢，在官十餘年，助知縣緝盜，有聲盜黨夙憾之。襄陽軍變，尉邑響應，穀城巨匪海鳳山糾衆作亂，繫君，慘殺之。子一幼孫，一同被殺，其妻與子婦遇救獲免。

駱吏目傳

君諱綸字文卿湖南江華人湖北蘄州吏目亂作知州亡去州人以君習州事遮留之君曰吾母老憚驚悸願奉母出境還來就諸君耳士民諾君奉母達漢口屬所親護歸其家返至蘄投河中死君官蘄二十年州中當興革事言悉中理能識別士紳賢否武進李寶淦牧蘄州建學舍改軍屯治隄防葺犴獄咸助規畫寶淦倚之其死也寶淦爲之傳

某典史傳

襄陽府某縣典史某傳者忘其姓名而嘖嘖道死難事絕奇偉郡變作官吏多出走某怒甚晨起長跽官廨大門外有過者叩頭要入廨凡負販擔糞者得十八人某傾篋出銀幣二百枚分遺諸人曰平生所積止此城破官逃義不得活然自經溝瀆所不甘也請討賊而死願諸君助我衆感其義從之各攜肩輿長木及擔物之具譟而出叛軍方踞府署某率十八人突入左右揮擊叛軍出不意被擊死者五六人俄而排槍起某與十八人者皆死之

張供事傳

君諱傳楷字睿斌順天人充宗人府供事多歷年所議敘得知州以家貧不仕爲人沈嘿寡言而任事勤不避勞怨貌樸澁望之如老僧宣統三年八月革命事起各省響應舉朝震恐上自親貴達官下至曹部惟日以徙家爲事君憤甚草條議千餘言詣都察院乞代上而察院官已星散無受呈者院役勸歸休君止院門外伏地大哭凡三日卒無一官至乃出所佩刀自戕院役亟昇送醫院以傷重竟死

孫舉人傳

君諱文楷字模山山東益都人同治癸酉拔貢是年舉於鄉累應禮部試不第潛心著述東脩自好知縣陳亮以文行兼優四字榜其門辛亥之變憂憤不自聊遜位 詔下家人祕不以聞明年二月君始知之則痛哭求速死青州知府鮑心增夙重君棄官將行君入郡謁鮑相對欷歔比還語其友曰吾病且死他日誅我者毋謂我死節也越數日遽歿君未嘗病實仰藥死而家人受遺命諱之久之乃聞於鄉里云君所著有今吾吟適野集老學齋詩文凡八卷齊魯古印箋四卷石印譜古錢譜一笑集各一卷

趙秀才傳

君諱彝鼎字煥文江蘇江陰人世居沙洲福善鄉八歲喪父長讀書好程朱之學補縣學生東修自好家貧不妄取宣統三年八月聞武昌之變憂形於色嘗曰國家興亡匹夫有責又曰孔子言成仁孟子言取義不知今有其人否耶蘇滬相繼變發憤不食十月初九日薄暮入三賢廟西樓自經死死之前夕家人以其出而不返也徧跡之不可得明日至三賢廟登樓樓門闔毀門入則赫然衣冠北面懸梁間氣絕矣既斂家人檢遺篋得手札二及自撰挽句書中處分家事纒纒千餘言有曰人固有一死但求合於義耳雖曰可以死可以無死死傷勇但我比召忽之死似尙合君臣之義又曰我以為國故不死於家而死於此以會文講學恆在此正欲以明人倫也其妻弟孫邦植錄遺札哀同里士夫哀挽之作爲殉節記一卷

施秀才傳

君諱偉字卓齋江蘇高淳縣附生年四十許性朴訥傲岸嫉俗不苟言笑鄉里咸重之兄仁歲貢生喜與聞新政君心非之金陵陷憂憤不食者累日遜位 詔下君聞而大慟翌日檢田產簿籍授兄子濟宏具衣冠拜家祠出門投塘水死塘去祠近水僅及鄰家人馳救則已絕衣裾猶未盡濡也有自輓句大書祠壁云有志竟成此去便歸安樂國他生未卜再來須待聖明時其從容赴義如此

李秀才傳

君諱澤霖字郁兩廣東香山縣附生居縣城南教授生徒以小學近思錄爲日課辛亥九月聞變閉戶絕粒五日死年七十有口番禺汪兆鏞作辛亥三秀才行以江陰趙彝鼎湘潭何承鑫及君而三也君臨難時手書清處士李郁兩墓七字授其子俾刊墓碣屬二子毋入學堂毋出仕二子遵遺教備於市並識字能讀書云

胡秀才傳

君諱口口字穆林湖北江陵人縣學生辛亥變作上書荊州將軍條議戰守事將軍壯之召君語曰荆營兵弱餉且匱電線中斷將馳書乞援汝能行乎君伉儷請行將軍具牘授之檄即日北發至資福寺止逆旅詭姓名爲賈人有識之者曰此胡某也警察通敵密以告遽來詰問摻其身獲文檄繫之沙市敵營有訶之者曰汝漢人奚助滿人爲得毋病狂耶君叱曰吾非病狂爾乃真狂耳言已大罵遂殺之

何秀才傳

君諱承鑫字性存湖南湘潭人幼穎異長乃沈潛宋五子之書尤服膺濂閩踐履篤實補縣學附生益務博綜於經研窮周易戴記許氏說文於史熟司馬氏通鑑出游諸郡縣無所遇訪同縣秦炳直於潮州炳直授二子讀以道義相剴切或論難古今不苟爲異同炳直擢提督以惠軍總稽查屬之惠軍提督所部駐守惠州者也武昌變起粵黨人聞風應惠俗習械鬪私貯槍礮官弗能禁又與新安隣黨魁發縱密糾各縣團族集衆號數萬九月己卯惠軍迎戰於蠻頭嶺大捷承鑫請重犒軍士籌戰守微聞營官有通敵者密告炳直而營務處劉殿元大言曰城果不守必聯全軍護主帥吾縱橫盪決有難則同死耳君感劉意遽俯伏以頭觸地有聲曰壯哉吾真服子矣亡何城中餉既罄米盡援師不至博羅歸善兩縣失君語炳直曰吾與子義當死毋使民間萬人同盡也已而攻益亟癸未昧爽自經於署西偏臥室斂時檢衣帶中自署絕命時日從容手書也

某生傳

某生充天津學堂教員所居鄰造幣廠壬子正月十四之夕天津兵警土匪勾結作亂攻造幣廠過其廬叩門索金錢不得已傾囊予之猶嗷嗷不去生責以大義且曰我職汝汝督署衛隊非耶明日吾必告張督兵速發槍生立斃妻某氏大慟斂既畢招族人至以幼子託之拔刃自刎死

辛亥殉難記卷三 武職傳

志將軍傳 劉從德 奉勳

公諱志銳字伯愚號公穎一字廓軒晚號迂安姓他塔拉氏滿洲鑲紅旗人祖裕泰太子太傅湖廣總督諡莊毅父長敬四川綏定府知府公幼穎異與弟志鈞有二難之目綏定君卒官公癯癯孤貧世父廣州將軍長善公絕愛公兄弟挈以偕行署有壺園兄弟讀書其中一時方聞博洽之士若張編修鼎華于侍郎式枚文學士廷式梁按察鼎芬咸樂與之游文譽踔起中光緒二年舉人六年成進士改庶吉士散館授編修志鈞亦聯捷鄉會試同官翰林公自以家世通顯得讀中祕書宜益究心經世之學思有所建白與瑞安黃通政體芳宗室祭酒盛昱定交用風節相鏃礪數上書言事忤朝貴意累歲不遷十八年春由詹事擢禮部侍郎中東之役上疏畫戰守策累萬言 德宗覽奏嘉歎 召見便殿公敷奏剴切至於流涕 上爲動容尋 詔赴熱河練兵未踰月 賞副都統銜爲烏里雅蘇臺參贊大臣有 旨毋庸來京公開 命卽行迂道出張家口而西中途妻病遺還京師單騎率數僕踰天山橫絕漠頓響風沙冰雪中所過臺站輒周咨山川風俗物產成竹枝詞百首文采斐然

若自忘其謫宦投荒矣居臺數年將軍長庚奏令赴孜牙子清釐中俄積案六閱月結案千餘外人折服公深識遠慮前後五上疏籌西北邊防發疆鄰狡謀中當軸忌左遷爲索倫領隊大臣領隊例不得專摺奏事端居簡嘿託詩酒自遣或披覽輿圖鉤攷地形阨塞爲戰事之備或出獵則周巡卡倫鄂博謂邊事日棘隱憂方大冀他日得當以報 朝廷又數年改授甯夏副都統疏請發帑二十萬開城外故渠得沃壤數千頃俾駐防旗丁屯墾有資累疏籌八旗生計略言比年 詔旨數以化除滿漢之見昭示天下然往者六部漢尙書猶有六人今新政行增部爲十一而滿尙書居其九且有以懿親筦部務者總督七而滿人居其五漢人占滿缺者不過一二副都統散秩大臣而已若僅曰冠姓氏通婚媼而一切取功名沐恩澤之路不得從同恐積忿難平爭心愈熾非 朝廷之福亦非滿人之幸語絕沈痛尤言人所不敢言戊申冬 兩宮相繼升遐醇親王攝政知公忠誠 特旨召還宣統二年拜杭州將軍之 命未幾調伊犁將軍賞尙書銜三年春入覲策所以弭邊患禦外侮者皆洞切時勢可見敏行又力陳新政多敷衍糜費請一切罷去專意練兵籌餉以救危局請邊地練兵費一百萬下度支部議僅予二十萬且斬不卽發公慨然知事不可爲念世受 國

恩義不卻願遂以六月犯暑西征八月至新疆聞武昌變起或勸公少留公不可兼程行九月二十日受任伊犁新軍多鄂人類少年輕儻教練處提調馮超新軍排長李輔黃尤叵測舊部旗兵竄情不可用公示鎮定日與諸營隊長官陳說大義羈縻者月餘已而蘭州軍譁變甯夏繼之伊犁新軍協統楊繼緒以兵叛十一月十九日夜佔軍器南北兩庫攻將軍署羣議舉將軍爲都督公峻拒之迫赴商會又拒之馮超遽發槍遂遇害事聞 詔贈太子少保照將軍陣亡例從優賜卹加恩予諡尋 予諡文貞公少負奇氣從宦綏定卽好習武事善騎射能於馬上發槍命中其後出入邊塞幾二十年耐勞習苦蓋始此其赴伊犁也公從弟志錡於門館得公手書告戚友者略言奉命出關值危局非承平時比吾以身許國不生入玉門想從我者必各具身手不愛頭顱有心肝耐勞苦自揣不能者幸母以竿牘願我嗚呼公之致命遂志蓋定於拜疏出國門之日矣綏定君之亡有妾魏年十七絕粒以殉公請於母夫人許他日得訃葬顧道遠無歸柩資淺厝郡東郭外後二十年公官禮部始得歸葬請於 朝旌表如例其篤內行如此無子以志錡子海昆嗣喪還京師海昆葬公於沙溝村先塋之左公有僕呂順忠勇樸誠亂作日侍公左右復奔走營棺斂撫尸號慟爲叛軍所

賤海昆歸其柩葬公墓側成其志也從公死者武巡捕官劉從德四川人教練官春勳京旗人


舊史氏曰公起家文學志量閎遠守邊庭逾十稔自號爲窮塞主數亦奇已熟察邊情備禍至之無日晚乃建牙於西疆危殆之秋權輕勢孤卒鯨餉匱巨變猝起不在外侮而在內訌又豈所逆料哉銜鬚畢命踐厥矢言志調於生前而名標於身後嗚呼亦足以爲史冊光矣

良都統傳

公諱良弼字贊臣滿洲

旗人留學日本陸軍學校畢業歸隸練兵處差遣旋充陸軍部

軍學司監督軍學司副使尋補司長時新設禁衛軍以公爲第一協統領擢鎮白旗副都統
宣統初元創設軍諮府補軍諮使平日以知兵名頗自負叛黨忌之三年八月武昌亂起各
省響應朝論紛呶大局岌岌十二月初八日日加午有崇功者造公宅投刺求見公方乘車
自外歸及門遽擲炸彈傷左股血如注治之不效初十日遂卒而擲彈者亦自負重創立斃
搜其懷得名刺則四川人彭家珍也事聞 上震悼 詔旨優卹如例



謝總兵傳 姚雲

嗚呼辛亥之變發難於武人亂黨乘隙構煽一隅星火全局瓦解疆吏望風卻走提鎮既裁存者率羸老窳敗無復同仇敵愾爲朝廷效一日死未有孤軍無援士靡鬥志艱難擗拄冀蹶而復振願望既絕從容就義如河南南陽謝總兵死事之烈者也公諱寶勝字子蘭安徽鳳陽人少孤貧長補武學生同治初從征西陲爲將軍金忠介部將後隸馬忠武克肅州暨關外諸城常奮矛前驅不避鋒鏑後以事與忠武不合棄冠服走博克達山爲黃冠光緒己丑忠武治兵畿輔移書招公不至洎奏補守備乃復出甲午從忠武奉天軍中與日兵戰失利忠武弟某陷圍中公突重圍拯之和議成公憤激謝去復爲道士裝寄跡白雲觀數年庚子秋統領柴洪山強之出大學士榮文忠檄充武衛護軍統領尋調赴河南始爲毅左營豫北營管帶繼爲巡防營分統駐軍嵩洛陝汝之交以獲匪功累擢至參將先後撫豫者咸倚以治盜累疏論薦擢副將宣統元年特旨署河北鎮總兵尋補授二年冬調署南陽鎮總兵仍節制河陝汝各營公感激奮發益自矢捐糜頂踵以報國家公之治盜也首嚴紀律所至毋擾民恆短衣執械徒步不騎爲士卒先或夜出簡從易服走數十里詭爲寶刀

者盜所用刀有鉤輒以是得盜或僞爲賣漿者往來盜巢偵虛實山中村民或通匪庇身家忌公之至也輒置毒飲水處公率勇士數十人攜水盥懷麥餅夜行山谷間食盡忍飢渴以爲常刀匪著名號者十數輩悉艸薙禽獮之洛陽張黑子嵩縣王天縱汝州董萬川盜魁中尤鷙悍者也黑子隱巖谷深處公購諜偵黑子將出掠道殷司溝設伏出不意乘之卒獲黑子又禽萬川於產莊天縱懼不敢出河陝汝之民乃得安枕而南陽王八老虎夙爲患聞公至移書定期來決鬥會大雪前期五日潛師誅賊巢賊未設備據中庭發槍兵士殪者前仆後繼公奮身入將卒爭入王走入室穴戶隙發槍火其廬遂繫王真之法自是南陽遂無盜三年移師嵩縣而武昌亂作馳還籌戰守豫南與鄂隣亂黨滋蔓訛言四聞公約敕部曲日夕巡邏自秋徂冬日不交睫者數十日而郡縣多響應將士觀望不欲戰獨都司姚靄雲忼愾願從戰冬十二月新野陷公集官紳籌軍食而省城大吏飛檄戒毋妄動公憤甚二十九日凌晨赴校場與衆誓死勿去而府縣官已遁紳士走新野通款矣翌日元旦五鼓興朝服北嚮拜泣不止天明城中火民軍乘之時各營以餉闕多引去將卒百餘人走裕州比至望見城頭白旗公怒髮上指乃屯東門外新街至夕遜位之 詔傳布至州公痛哭召將卒以

忠義教勉揮之去丙夜屏僕從易朝服以槍自擊洞臂而仆壬子歲正月初三日也年五十
囚將卒趨視號慟失聲倉卒不得櫛以大旗裹尸舁至獨樹鎮始斂遠近聞者無不流涕公
短軀幹面犁黑目光如電在馬上揚眸瞻矚見者驚慄性剛直不能唯阿從上官意視匪如
仇視僚友如弟昆下與士卒同甘苦有勞無愆賞有喪亡者例卹外復厚予以金贖其家所
至屏絕餽遺服食蠶繭如窶人鳳陽故居僅茅屋三楹而已統兵十餘年輕財急公恆稱貸
濟不足負責巨萬巡撫寶棻疏聞 詔許累年卹賞軍士銀九千餘兩作正開銷用勵廉
將前此未嘗有也姚鶴雲陝西人舊爲多忠武部將擢都司隨公充營務處公亡後爲民軍
槍斃云

舊史氏曰公之領河北毅軍也有忌者以蜚語上聞巡撫海豐吳公疏言寶勝善治軍有廉
操疾惡過嚴爲豪族強宗所嫉名滿河洛謗亦隨之時局日艱宿將彫落宜爲 朝廷愛惜
將才備他日緩急之用 天子仁明卒保全之而公乃卒以死報國家矣歎乎死猶生哉

趙總兵傳

君諱國賢河南固始人少壯從軍關隴以驍勇善戰名積功累擢至總兵 記名提督授廣東潮州鎮總兵留充武衛軍統領陸軍第六鎮統制訓練士卒宿衛宮禁 朝論倚之宣統二年之潮州任會綠營兵弁大裁汰存者不足資扞禦巡防營隸潮州知府部下總兵勢益孤三年九月革黨起羣情洶洶知府陳兆棠開城迎降君引大義責兆棠不聽號召所部無應者憤甚投繯死事聞 優詔褒卹加恩予諡追贈太子少保銜賞騎都尉兼一雲騎尉世襲罔替給卹銀千兩照提督陣亡例賜卹子趙玉堂以主事用尋 予諡忠壯

黃總兵傳

公諱忠浩字澤生湖南黔陽人光緒十四年優貢生累試不第好讀儒先性理諸書慕其鄉羅忠節曾文正之爲人獨留意兵學赴日本參觀大演習歸益研討戰術用知兵名於時二十一年以內閣中書募湘人入鄂守田家鎮礮臺尋移駐武昌所統者曰武靖營二十三年治軍長沙二十八年再至鄂薦擢道員加三品銜明年還湘總營務處所統者曰忠字旗五營又明年廣西賊陷柳州湘撫檄公任西路邊防而朝廷特重湘軍命率所部援桂柳州梅寨之戰用少擊衆賊大創三十一年簡江南狼山鎮總兵官時方居憂固辭不拜命粵督以聞詔旨嘉勉改署理尋調廣西右江鎮總兵官三十二年補右江鎮未幾乞假去宣統二年從蜀督趙爾巽入川五月署四川提督八月卸任歸綜公生平實與兵事相終始而晚遊奇變不爲威屈一瞑而萬世不視嗚呼忠矣公之自蜀歸也頗厭倦兵事將顯志壹慮治鑛業爲桑梓久遠計宣統三年京帥開全國教育會公與焉爭鐵路國有之非建大濬洞庭湖之策論議侃侃爲湘人先還長沙兩月而變作先是湘省練新軍未成鎮也留巡防營分中西南三路統以宿將循湘軍舊制而以新法教練之湘撫余誠格初至倚公如左右

手以中路巡防十營界之受事三日鄂亂起長沙一夕數驚時新軍有叛志而巡防營議未合不得逞已而巡防營被煽動將以九月初二日城內外同舉事巡撫偵知之令收繳機關礮月朔平明新軍變突入小吳門以一隊劫軍裝局一隊趨撫署公與巡撫偕出堂皇撫融至再勢洶洶不可遏要巡撫爲都督巡撫佯諾退旋從間道逸署中火護弁楊詠松挾公自又一村出及門遇亂兵被執詠松趨諮議局乞援救而亂兵擁公行以刃刺公傷臂及股流血被體公閉目不一語至小吳門城樓遂被害年五十三斂以薄棺厝之城根家人至乃敢櫛還葬黔陽道中設奠者數百里不絕事聞有 旨飭皖撫查覆逸遁未上奏故飾終之典不及云

舊史氏曰公抗懷任氣人也庚辛之際亂機已成公解兵柄久領舊軍以當新軍之衝變起肘腋力有所不能制勢爲之也義不可撓有死無二蓋夙昔讀書之效而漸染於鄉先正忠義之風者其來遠矣

王總兵傳

公諱有宏字景伯又號錦波直隸天津人起家行間中日之役從征出關和議成入江南防營緝梟匪有功累擢記名總兵官定興鹿公撫江蘇器異之從鹿公入秦回鑾扈從尋留豫豫撫張公人駿倚以練軍張公督粵移督兩江君皆從管江南緝捕營總督衛隊隸之金陵新軍變提督張勳戰頗勝而變軍別出百餘人攻督署君預設機關礮堂上擊卻之十月初旬各省叛軍麇集薄城君單騎馳出通濟門以三百人戰叛軍敗走君踞山巔覘敵敵亦登山頂以遠鏡測知君所在發巨礮中頭而仆而殞總督電聞詔贈太子少保銜照提督陣亡例賜卹給卹銀千兩先是蘇滬未變君請率三千人赴滬守製造局斷蘇杭鐵路總督不能用論者尤惜之

張標統傳

君諱景良湖北人將弁學堂畢業生游學日本歸爲當事所重充湖北新軍標統辛亥武昌之變其始僅工程營數十人耳他軍尙無應者而總督瑞澂倉皇遁城內槍聲一晝夜於是各營皆起諸軍將擁立都督設軍政府號獨立君慷慨說都督曰 朝廷已宣布立憲不宜更言革命公受知遇久賭將惟公命是聽盍三思之軍將聞君言皆怒欲殺君不得已乃拘係君置之署中是時大兵攻漢陽急君請赴前敵自効且以妻孥爲質乃委充司令官至漢陽九月初六日之戰大兵卻君率礮隊出臨發每礮予礮彈一每槍給槍彈一排戰未久而子彈罄君遽大呼曰前敵敗矣揮後隊速退否者全軍覆矣衆不知所爲遂大潰死者相枕藉大兵乃進屯大智門諸軍將爭赴譚述戰狀請誅君遂殺之君臨刑夷然仰天大言曰某今日乃不負我 大清矣王布政乃徵言

何總兵傳

公諱師程字雪門漢軍鑲紅旗人父某從僧忠親王剿撚匪有功戰沒連鎮 恩卹騎都尉兼一雲騎尉世職公由騎都尉洊擢副將保總兵補江南督標中軍宣統三年十月十二日江甯陷自戕死公雖右職顧恂恂儒雅工畫山水而臨難完貞乃克紹先烈云

張總兵傳

公諱嘉鈺起行伍累官雲南昭通鎮總兵辛亥九月署騰越鎮總兵未幾兵變急出署彈壓行至堂皇兵猝至遂被戕

鍾統制傳

君諱麟同字建堂山東濟甯人入衛海武備學堂畢業初爲排長洊擢至統制性剛正疾惡嚴嘗從鄭孝胥京卿龍州軍中後調入滇充陸軍第十九鎮統制官辛亥九月初九日七十二標兵變夜半自北校場卒入城君率衛兵百餘人扼五華山而守居高臨下手發機關礮斃叛卒數百人而七十四標駐巫家壩者馳入城兩標更迭戰山下軍械局伍承彥與變軍合移巨礮城上攻五華山蛾附上日加午官軍傷亡多子彈盡君率衆突圍出轉戰力竭慨然曰身爲統將大局破壞至此何面目復生存耶以手槍自擊而仆變軍斫其頭剝其膚剖心而啖之事聞得旨優卹有忠骸支解慘不忍聞之論尋予諡忠壯

范管帶傳

范鍾岳山東濟南府人天津武備學堂畢業生歷充排長隊官入滇充輜重營管帶任事忠實得士卒心辛亥九月省城兵變率所部拒戰自晝達夜傷亡過半部下從賊無忍去者粹中礮斃於陣事聞奉 旨照正參領陣亡例從優賜卹

孔統領傳

君諱敏琴山東人官滇久宣統初領開化巡防營新軍變脅之降不可中十三槍而殞每發一槍問降否曰不降至十三槍乃中要害死嗚呼烈矣

白遊擊傳

君諱如鏡字顯齋饒黃旗漢軍培豫佐領下人由禮部筆帖式補鑾儀衛鑾儀尉擢治儀正尋出爲廣東興甯營都司缺裁留潮州宣統元年署潮州鎮左營遊擊三年九月二十四日兵變不屈死年三十七

周都司傳

君諱飛鵬字華三號翔千江西新建人光緒十四年武舉人累官至都司賞戴孔雀翎宣統三年充湖北襄防馬隊管帶駐光化縣老河口鄂軍變縣人王仁葵出獄囚張國荃李秀昂糾合水師營謀亂召飛鵬飛鵬抗議持不可將馳還城閉國荃秀昂躡之飛鵬掣佩刀格鬥賊發槍及馬腹馬仆俄而左股傷負痛走槍繼至洞背穿胸死

何千總傳

何培清字鏡亭廣東歸善人入陸路提督標補千人長光緒三十四年領連和巡防營捕戮積匪里閭晏然提督秦炳直才之調領博羅防軍剿羅桂幫匪盡殲之會鄂變粵響應民軍猝集惠郡號數萬人既圍攻博羅更以衆扼東江南岸惠州大營聲息遼絕省城援師障下游不得濟培清以兵三百人登陴守礮石交下兩晝夜敵不得逞軒民開門迎敵九月辛巳日加午敵麀集執培清領軍者聞培清賢不欲死之越十日釋縛出郭外猝遇羅桂死黨夙憾君者出不意狙擊死之領軍者聞之哭失聲

何守備傳 具何培清疑卽一人姑存待考

何培德廣東候補守備充巡防營管帶駐博羅縣宣統三年十月亂作匪薄縣城君嬰城苦戰中槍死提督秦炳直疏聞 詔予從優議卹

張千總傳

張德潤廣東南海人候補千總爲香山縣巡防營管帶官嘉文九月革軍入縣城德潤守南門力戰援絕被執罵不絕口遂被害投尸江中

戚千總傳

戚從雲江蘇徐州府人由行伍官千總隸江蘇巡防營以緝捕動能爲洪觀察爾振所賞辛亥春率巡防一營駐黃渡蘇涇亂作巡防隊多響應獨抗不從遂爲民兵所戕

吉前鋒傳

吉陞字允中滿洲鑲黃旗人由文學堂畢業補前鋒充海籌兵輪幫帶官時主海籌艦事者爲喜昌辛亥八月鄂亂作長江下游皆震海軍艦大失利事急喜昌將遁語吉陞盍偕行乎吉陞不可憤極投江死

黃哨長傳

黃新字兆熊湖南湘潭人父灝縣學附生新出後世父貧不能讀書從軍入閩充陸軍什長勤樸而練於事福州知府秦炳直亟賞之秦後爲廣東提督新往從焉營中多鄉人有疾篤者咸託歸骨嘗挾五六樽渡海涉江以達於湘獨任勞費其勇於爲義如此再至粵爲哨長廣州黨人所萃既狙殺一將軍一提督秦頗自危而所部多懷貳心獨湘人相從者尙可倚新時爲衛軍秦往來廣惠二郡新輒從兄熙瑞充惠安水軍中營文案兼司稽查駐河源新充左營隊官駐博羅鮎魚角地當博羅對岸故盜藪新棹小舟巡邏風雨寒暑不少輟逾年惠州防急新熙瑞皆檄調還郡守西門廢寢食者三日城內兵開門迎寇一城驚徙有訛傳提督已被害者新大慟誓死然擾攘中不得達主帥所乃登北城樓熙瑞與其子俊暨所部數人偕熙瑞懼新妄動相守不去新發憤曰與爲人殺母甯自殺耳一日攜手槍下城樓久不返迹之則仰臥雉堞間以足踹槍機自擊死矣面如生明日亂兵來屯城樓熙瑞潛殯之已而移瘞城下乃與其子逸去問關還湘潭新無子熙瑞以次子聲仁爲之後

趙管帶傳 趙錦標

趙翰階字春廷直隸人從浙江巡撫增韞入浙充衛隊管帶官宣統三年九月十四日杭州亂撫署被圍急率其猶子趙錦標排長俞明鑑副目俞金魁兵士樓汝寶突圍入見巡撫方扶掖老母避後園遂相與護巡撫家屬穴牆出匿民舍而自偕錦標舍於方姓家明日聞巡撫爲新軍所拘翰階奮然欲往拯之挈錦標及巡撫義子某持手槍出中途遇衛隊兵陶永奎禽翰階以獻遂與錦標同時被害

倭和布玉尊譚鳳亭陳順興劉占魁柏某熊得壽劉駿堂傳

倭和布滿洲正白旗人由侍衛官湖北施南協副將宣統三年九月城破戰死

玉夢字子祥漢姓張京旗漢軍世襲一等輕車都尉補荊州城守營參將缺裁還武昌兵變遇害

譚鳳亭黑龍江海倫府巡防馬隊管帶官宣統三年十月陣亡奉 旨優卹

陳順興劉占魁山西人充山西南路巡防隊官同時巷戰死

柏某廣東嘉應州遊擊兵變被戕

熊得壽湖南長沙協都司爲人狙擊死巡防隊官候補遊擊劉駿堂爲民軍捕獲戕害

杭州靈江門更夫傳

更夫不知姓名浙省警察沿保甲之舊城中設更夫夜鳴鉦以巡於市辛亥十月之變新軍自城外入經望江門時方昧爽更夫猝見軍隊至鳴鉦大呼曰兵反矣兵反矣狂走向官署冀官之警備也新軍訶止之不聽鳴鉦狂走如故軍士追及槍擊之立斃更夫賤役能識大義不畏死乃如此

簡游擊傳

君諱純澤字廉靜湖南長沙人父敬臨 記名提督福建漳州浙江衢州鎮總兵從左文襄入關隴攻金積堡叛回戰死諡勇節卹賜騎都尉兼一雲騎尉世職無子以弟桂馥子嗣卽君也君方七齡讀書有奇悟及長不治舉業博習經史尤覃精天文數學光緒中以襲職從戎北至津沽南至粵在粵嘗筦權釐獨除煩苛用師船捕盜伏莽以靖尋從大軍度隴以勞累擢至補用游擊加副將銜戰事定留辦賑撫力杜浮冒爲同列所嫉去入秦京師拳匪亂陝西布政使升允率師北援君與歐丙森從遇夷兵於正定逆戰斬敵夷兵百餘人會痞作莫能興聞丙森戰死大痛力疾請戰升允尼之君上書責升允有十不可解語正定令某將迎夷師入君下令軍中嚴陣待且誠令若必迎敵先殺若矣令懼詭語夷城中伏兵多夷師解去尋隨升允還秦升允擢巡撫以君筦武備學堂兼令新軍右旂軍紀嚴肅不以空糧充私資遭本生母向宜人喪將歸而布政使樊增祥夙善君固留之巡撫曹鴻勳以君爲新軍教練官兼測繪局尋領新軍第一營後數歲巡撫某以貪黷聞屬吏非門金不得通謁君積二歲不往見巡撫銜之君與督練道員王毓江大齟齬乃謝歸還長沙東鄉未朞而國變里

居數年日夕悲咤或仰昧天象曰三能不平久矣國將亡或咄咄自語丙辰夏某月夜走省城遂北行之京師第四子實從舍鄭編脩沅家而湘陰陳參議業迎君至天津授其子讀遺寶歸明年冬遂有威海衛獲浮尸事先是君客天津鬱鬱不自得秋八月至煙臺訪煙霞洞往遊焉洞巖巖莫可栖止乃去之威海十月十五日瀕海合慶村民見浮尸起之則絲衣斂髮繫縞巾巾中裹佛經數卷銀幣十有自書絕命詞曰道德仁人遇見尸身卽掘土穴深埋海濱毋用棺木槨葬以薪而朝北關志繼先臣經文殉死願通萬神馬靈封後樹一墓珉鏤四大字有清遺民所餘銀餅謝意聊申村民大驚歎願莫知誰何有尹姓者趨至曰此長沙簡某也嘗偕遊煙霞洞故識之遂相與斂而葬之且立碣焉於是威海人谷銘訓孫高起先後貽書長沙以告湘人士及其家人君死年五十五生平所著書甚多詳見同縣鄭澤撰君行狀中

舊史氏曰君死事濟南人傳述至京師涑水饒濟臣爲詩弔之以語勞京卿乃宣京卿以告余後得鄭澤所爲狀乃益詳君家世忠節讀書明大義茹痛五稔意若有所待乃卒蹈東海死悲夫悲夫死非辛亥事然致命遂志積數歲如一日也故繫之卷末云

辛亥殉難記

西安駐防

文將軍傳

承燕

公諱文瑞鈕祜祿

公襲封男爵充頭

戰地公策守禦邊

署綏遠城將軍率

青州副都統念旗

副都統未之任擢

秦中九月朔西安

疾趨南街遇新軍

人分陣而守新軍

旗兵多傷亡公督

辛亥殉難記

猛攻旗兵火器竭漸不支鐘樓發開花礮東門破終夕巷戰旗兵死者二千餘人餘皆潰其
留者親兵十餘人家丁一人及公子熙麟而已環請暫避爲後圖公忼慨曰吾統兵大員有
職守力不能戢亂負朝廷恩惟一死耳口授遺摺趣熙麟書之命乘間達京師以上整衣
冠投井中死幕僚秦鶴鳴出公尸斂之熙麟間關北行道梗比至京摺不得上故卹贈之典
不及云左翼副都統承燕亦投井死右翼副都統克蒙額力戰死

斌恆傳

斌恆字雪樵家世通顯官鑲藍旗協領辛亥之變率旗兵拒戰北城誓死報國故衆無退志久之左右多傷亡斌恆負巨創猶大呼殺賊手刃數人力竭死之年五十七妾王氏有子女三或風之出走王氏曰夫死忠妾當死節耳挈子女赴火死斌恆世母故協領訥爾吉春之妻某氏年七十餘率其從子之婦及孫婦子女等十八人侍婢數人同日縱火自焚死

瑞明傳

瑞明字兆卿鏗紅旗人積勞擢鏗黃旗佐領辛亥九月變起率擡槍隊戰於北城奮不顧身
猝中礮死年四十六其叔母赫關氏子普眞女藤藤皆殉焉

多英傳

子奎成奎章 從子奎斌奎莊

多英鎮黃旗人官防禦長子奎成舉人京師法政學堂畢業生陝西候補知縣民軍亂作多英與奎成率妻女等皆投井死次子生員奎章與民軍戰一晝夜身中數槍城陷急歸視父母知已殉至井畔痛哭亦投井中死族弟奎斌奎莊皆及於難

奎亮傳

奎亮字聚五鑲黃旗人充二甲領催爲協領所倚以勞擢驍騎校記名防禦充將軍署巡捕官辛亥秋民軍起奎亮督旗兵戰於北城自朝至於中夜中礮罵不絕口遂死

林啟林璋傳

林啟字照田，鏗紅旗人。幼嫻騎射，有智略。積官驍騎校，累充警局巡官、礮隊軍需官、前鋒營章京、弟林璋字寶亭官前鋒，充八旗新軍正目。民軍之崛起也，據軍裝局，全城震恐。啟聞報，與璋謀以身殉。曰：「臨難苟免，此大恥也。」薄暮，民軍攻滿城，啟率百餘人登北城，擊之。民軍少卻，詰旦復出戰，以忠義激勵軍士，人樂爲效死。日方午，東城破，民軍薄北城，啟腹背受敵，士死傷略盡。啟隻身入陣，手刃十數人，卒爲民軍所戕。年三十六。璋戰沒東城，年二十七。

文昭傳

文昭字郁如正藍旗人繙譯生員補筆帖式擢鎮黃旗驍騎校性剛直好讀書充講武堂班長九月一日民軍起文昭集堂中百餘人喻以大義願死戰報國衆從之戰於東城一晝夜不休明日又戰於大菜市敗民軍方議堅守大隊猝至發巨礮攻城城崩衆皆傷亡文昭死之其家屬殉難者二十餘人

阿爾精阿傳

阿爾精阿鑲藍旗人貢生直隸州州判權釐金於方計堡受代運道經咸陽遇民軍將劫之
忼慨語軍士曰吾當未亂時志欲以忠報國家今亂作矣敢偷活耶衆軍嘉其義不加害
乃入邸舍肅衣冠北向拜自刎死妻周張氏吞金以殉

惠祥傳

從子廣興

惠祥字吉軒鑲黃旗貢生候補府經歷充八旗巡警局巡官民軍起惠祥率警生守營城城陷投井死家屬從死者六人從子廣興同日殉難廣興母趙氏年六十餘執短刀闖入民軍欲殺賊尋自刎死

喜明傳

喜明字哲臣正紅旗人光緒三十年舉人短小精悍有膽志嘗語人曰丈夫當死疆場效馬革裹尸何能死兒女子手耶辛亥九月民軍猝起領兵百餘人獨樹一幟誓於衆曰國家養兵百年用兵一日余書生也願一死以報戰不利退守滿城民軍屬集軍士多傷亡喜明奔告其母曰吾屬死不免矣母曰婦人以潔身爲重可受辱乎遂帥子婦二人幼孫一人投井死喜明有三女匿鄰近廟中喜明走入廟手刃之血書壁間曰喜哲臣三女死於此還至家縱火自焚死年四十六

惠斌傳

惠斌字蓋臣正黃旗人光緒二十年舉人授徒於三官廟比設學堂爲崇倫學校校長善誘不倦所成就甚衆民軍之變率衆從戰北城中礮死

春詳傳

春詳字梅溪，鑄藍旗人。附生性端謹，言笑不苟。辛亥九月朔，聞變語。兄若弟曰：我營器械，不利曷以禦敵？城破家必亡。自古全家盡節者，有光史冊。吾願死矣。兄等何如？則皆應之曰：與爾同死。臨難，母苟免也。明日，城陷，聞礮聲。近曰：可以死矣。遂偕兄弟妻子，輦十餘口，縱火自焚，無一免者。

金常傳

金常字倍五正黃旗人附生充本旗學堂教習被選爲議諮局議員民軍起急歸滿城執刀械從戰北城身中數槍沒於陣年四十

德森布傳

德森布字潤之鑲藍旗人光緒八年武舉人辛亥八月監修城房工未竣而民軍起領兵數十人守大柴市一日夜水漿不入於口語兵士曰吾儕祖若父以來世受國恩未得酬報敢倖逃爲苟活計耶遲明攻益亟東西邊牆皆墉率衆拒戰中礮死

音德本傳 弟額哲亨

音德本字興甫鑲黃旗人好讀書工詞章辛亥秋聞武昌變上條議十二策於將軍將軍不能用省城民軍起音德本方與會於諮議局比馳還滿城閉憤甚走多公祠自經死九月初三日也弟額哲亨本旗領催充步軍排長與民軍戰城陷死之家屬投井死者四人

俊亮傳


子文錄文耀 孫錫純錫振 姪孫錫麟

俊亮正藍旗人雲騎尉世職辛亥九月與民軍戰於東城死之年六十二子文錄文耀轉戰北城沒於陣子婦二人孫錫純錫振姪孫錫麟俱投井死

辛亥殉難記

卷四 駐防傳

九



江甯駐防 羣葬紀略附

盛成哈郎阿傳

江甯駐防營火藥庫明冷宮故址也

冷宮之名未詳緣起

辛亥十月兵變將軍鐵良出走旗人倉卒避

難者夥顧其死狀尤烈者曰佐領盛成曰防禦哈郎阿盛成字挹軒荊州駐防旗人同治初金陵克復調江甯駐防中江南武鄉試舉人由驍騎校累擢鑲黃旗佐領民軍之攻江甯也盛成逆知城不可守與知交數人約城破後各挈其孥就火藥庫謀同死衆諾之十一日天保城破翌日有言繳械免死者衆要成偕往不應日加午率子婦趙氏孫國瑞女三赴藥庫攜酒痛飲酒酣縱火自焚死哈郎阿字叔芬與盛成友善聞成攜家人就藥庫遂挈妻張子成仁成義女一往從之同時燬焉時旁近旗民無老幼男婦咸奔赴巨響一震城垣摧崩骸骹鬩散戰事稍定郡人拾遺骸築大冢立碣而識之

南山傳

南山字壽民荊州駐防旗人光緒初從父調江甯隸鑲藍旗充左司貼寫嫻習文牘勤不言勞父歿哀慟如孺子泣官前鋒校累擢鑲白旗防禦引見歸未及朞而武昌亂作宣統三年九月民軍攻城急南山隨將軍鐵良駐軍北極閣十月十一日天保城破將軍走十二日凌晨馳還知同僚咸集都統署趨入昌言曰吾輩受國厚恩今城破宜各發天良背城一戰事不濟以死繼之語至再無應者遂出召軍士語如前無應者引吭號曰汝曹負恩乃至此乎還坐一室良久聞室中槍聲起衆奔視則已自擊死矣年三十五妻某氏聞南山殉節抱其子縱火自焚死

松柏傳

松柏字嵩山滿洲鎮紅旗人官防禦充巡捕官辛亥十月民軍入城與其妻子女聞戶自焚死凡八人

培秀傳

培秀字希賢荊州駐防旗人同治間從父調駐江甯隸正白旗三甲性質樸事母以孝聞兄弟三人仲弟及婦俱劾秀善視其子女母喪哀毀柴立服除以領催補鑲黃旗三甲騎騎杖賀者盈室培秀自以難不遠養對客悽惋宣統三年十月民軍攻江甯天保城破語其妻曰吾族自入關以來世受國恩今城亡敢偷生乎妻曰君死忠妾避婦人嘗受父訓矣願從死遂以襪褌子授其戚某走避存宗祀一女一姪女各飲以阿芙蓉膏氣絕夫婦闔戶縱火自焚死越三日其友某來視見數尸縱橫灰燼間不可辨以敗扉覆之走告僚友斂其骨而葬之培秀年三十六妻甘氏舉人甘福女也明年其戚某病劾培秀子孺其同居衣林布之妻女及他姓亦自焚死而姓名無可攷

興發傳 錦秀

興發字竹村漢姓關滿洲鎮白旗人官前鋒充八旗中學教習辛亥十月民軍入城不屈約同營錦秀投塘水死年四十四錦秀滿洲鎮監旗人亦官前鋒

富勒渾布傳

富勒渾布字蘭溪漢姓周滿洲正藍旗人幼敏慧初學爲詩文每出塾師所限之外不數月即成篇師大奇之十五補江甯府學生益劬學旁及算術地理星命之書靡弗通科舉廢充小學校長意弗善也嘗語人曰世人皆濁而我獨清吾其與屈靈均爲伍乎宣統三年兵變張軍潰民軍入城堅坐一室不爲動弟敵卿趨之去不從曰吾性慙直豈可受辱耶敵卿敦勸至泣下乃偕出城至中和橋遇漁者數人阻之且揚言將縛獻民軍欲褫其衣蘭溪憤置一躍投中流猶抗聲語弟曰吾今日乃遂吾志矣年四十八敵卿既無可援拚跳身得免明年乃招魂葬於萬壽寺山之北隅

汝霖傳

汝霖字兩生漢姓關州鎮白旗人江甯府學廩生善書學篆分輻工而性尤好武光緒甲辰入將備學堂畢業充第九鎮三十三隊第一營排長逾年擢隊官宣統三年八月調駐練陵關時新軍皆懷貳心汝霖在軍中持異議遂見害

恩錫傳

恩錫漢姓常滿洲正藍旗人游學日本入振武學校畢業歸爲三十四標第一營教練官辛亥八月調駐秣陵關第一營變恩錫不從遂被害九月十九日也同死者隊官彭興滿洲人

魁稷傳


魁稷字宗岳滿洲正白旗人將備學堂畢業生第九標破隊執事官辛亥八月調駐秣陵關民軍亂作爲同營排擠九月十九日見害

長明傳

長明字朗齋滿洲鑲紅旗人江南巡警學校畢業生充浙省巡官將軍德濟愛其才命肄業於陸軍講武堂杭州亂事起講武堂諸生被煽動一夕相戒毋就寢長明怪之詰所以語不合諸生察其異已也羣起斫之於講武堂之操場

洪某傳 劉金祥

洪某旗人居洪武門內聞變先以婦女輩投之官井還至家與同居劉金祥闔室舉火自焚皆燬焉郡人檢洪劉二家焚屍得白骨數堆乃就屋基爲冢揜之井中屍日久皆腐於是丟井欄實土壅井更壘土石成一大冢云洪某佚其名劉金祥亦微者激忠憤不顧其身家可謂知義哉



江甯駐防營死難人民叢葬紀略

辛亥十月金陵之變八旗駐防營死者不可勝計江甯魏梅孫家驊得金陵戰地掩埋攝影圖圖中掩埋之地十有七乙卯歲林稚眉志道復據紅十字會宋培之掩埋圖說增戰地叢葬處十有三並錄之 一朝陽門迫近鍾山戰地城垣轟毀事後掩埋旗民處 一靈谷寺無樑殿在鍾山南麓兩軍戰地滿漢傷亡兵丁叢葬處 一馬羣鎮爲旗營養馬處在鍾山東麓戰時傷亡兵丁叢葬處 一天保城龍膊子兩窪之間陣亡滿漢兵丁埋葬處 一小衛崗陣亡滿漢軍士合葬一大塚 一孝陵衛把總署傍陣亡滿漢軍士叢葬處 一司善廟右掩埋旗丁旗民各塚 一孝陵衛下馬牌掩埋大小屍骸各塚 一堯化門陣亡滿漢兵丁掩埋處 一堯化門陣亡滿漢軍士掩埋處 一堯化門車站後掩埋陣亡兵丁處 一孝陵衛戰地陣亡滿漢兵丁叢葬處 一麒麟門掩埋兵丁處 一明故宮垣外爲內五龍橋河撈獲殉難人民叢葬處 一內宮偏殿廢址爲內五龍橋河撈獲殉難遇害旗人三十餘名叢葬處 一火藥庫爲縱火自焚之佐領盛成及其子婦趙氏孫國瑞女三口防禦哈郎阿及其妻張氏子成仁成義女一口合作一大塚 一五馬橋爲殉難旗民叢葬各塚

一外五龍橋爲殉難男女旗民叢葬各塚 一皇城白虎橋爲殉難人民叢葬各塚 一洪武門內爲旗人洪某家婦女投井後就井填土作塚之所 一洪某與民人劉金祥合家自焚就屋基作塚之所 一都統衙門前掩埋各塚 一西華門內泰山廟後圍掩埋各塚 一西華門內菜園隙地旗兵二十餘人遺骸掩埋各塚 一洪武門內駐防營屋基內殉難遺骸就地埋葬處 一洪武門內西邊菜園旗人婦女投井殉難撈獲遺骸就地埋葬處 一五朝門外殉難旗人叢葬各塚 一洪武門外殉難旗人叢葬各塚 一通濟門至洪武門內土岡一帶埋葬各塚此段最表長塚最多分圖爲四 一旗官康佐領公館前隙地埋葬各塚 右爲圖凡二十續圖十三其事實可紀者僅盛成哈郎阿以下十餘人其姓名可紀者表列男婦四百數十人其他絕項斷脰骸分骹裂骨不知其誰何蟲沙冥冥沈蘊終古吁可悲矣

京口駐防

宗室載都統傳

公諱載穆字愛棠號敬修爲多羅恂勤郡王五世孫曾祖永碩封固山貝子祖綿翔鎮國將軍父奕雲記名副都統一等侍衛公年二十補侍衛長官某侵同官廩給衆莫敢發公將揭其狀某聞之屬所親解免出其資分饋於衆坐是官不得進者累年庚子拳匪亂各國聯軍入都 兩宮西狩公痛哭自盡者再遇揀不得死三十二年擢太原城守尉明年有 詔遞裁駐防分遣歸農公倡農業勸女工興學校比去晉旗民男婦務耕作嫻織紵者二百人公之教也省城門有八而閉其二阜城門當汾河之衝河決土壅不能通車馬有議援故事閉之者公謂此汾西諸村民入城孔道請於舊門南改闢新門民咸稱便宣統三年四月簡京口副都統八月武昌變起公下令戒嚴繕城垣設練兵處定城守營防條規晝夜巡邏旗漢民雜居者皆按堵江南新軍兩標駐鎮江聞亂思蠢動公與協統杜淮川語宜拊循軍士曉以大義已而新軍忽移駐鐵道旁運槍彈者繼屬公知有異告急於江甯將軍不應蘇撫程德全號獨立傳檄鎮江巡防營潛通蘇軍城中癸卯十六日官紳集議會於萬壽宮定

滿漢聯合策相約毋戰且要旗營繳軍械公知事不可爲罷會大慟謂左右曰吾上負 朝
廷恩所欠止一死耳左右環跪請繫衆心維危局翌日鎮神楊邦彥來趨檄公不許會革
軍入據漢城旗營大譁公進八旗軍民而語之曰駐防兵單餉源絕吾戰死甘如飴願糜吾
民肝腦膏鋒刃吾弗忍若曹其勉徇衆議紆急禍吾身爲大臣且天潢親也義不可以不死
草遺疏手自緘印遣佐領良才賈赴京師公隨行四僕惟一僕留日夕侍公側見公陽陽如
平常偶退休詰朝入公寢室則公已自經死矣九月十九日也郡人哀之爲斂殯如禮得懷
中遺書猶以旗民七千人生命爲念將軍鐵良疏聞 諭曰戰穆業經身死應得處分免其
置議並著鐵良將該副都統死事情形查明具奏其後江甯夫公死狀無由上聞而宗人府
亦無奏請賜卹事故喪贈之典不及云公子溥芬七品筆帖式留太原明年春迎公柩北還
夫人祖氏以驚憂致疾卒

舊史氏曰吾聞諸鮑振鏞振鏞聞諸公子溥芬曰溥芬侍先公之京口遣還晉陽瀕行誨之
曰方今民窮財盡政以賄成禍至無日吾服官四十年無不可告人事死生得喪非所計爾
勉自立毋以吾爲念蓋誓死報國固早計決矣嗚呼鄂湘離變蘇甯猶可爲也蘇亡而鎮郡

隨之公以貴胄身丁其戾不忍人民塗炭而以一死自完志亦可哀矣哉

延浩傳

延浩字子餘蒙古鄂伊羅特氏漢姓文性剛介年七十矣面純赤白鬚彪彪然狀貌雄偉善騎射意氣如少年由筆帖式累擢協領以原品食俸聞武漢事起曰吾雖老猶可力盡王事社稷果危我輩可偷活耶比知都統亡憂憤默不語一日沐浴具衣冠北面再拜遂僵臥不食數日卒年七十四

文蔚傳

文蔚字子貞蒙古人漢姓劉正紅旗佐領豪邁有膽智同治初從將軍都興阿軍中以勞賞花翎鹽提舉銜擢佐領睨眄一世恆鬱鬱不自聊辛亥亂作文蔚年八十矣家人勸出避文蔚曰吾世受國恩臨難苟免非人也果得死所亦生平快事母我慮惟數與家人談古來忠義節烈事子若孫侍左右解慰之一夕痛飲哭不止家人猶謂其醉也中夜遽卒蓋陰以鴆毒自戕云

世寬傳

世寬字裕民蒙古鑲白旗人漢姓余祖噶喇舉人道光壬寅死難卹予世職父某以從征粵匪功授花翎協領世寬文學生歷官佐領辛亥之變憂鬱憤懣絕食卒

普亮傳

普亮字子明蒙古敖漢氏漢姓馬平居御卒伍如家人辛亥變起枕戈待旦志在決死戰九月二十日午夜聞槍聲躍起出門大呼殺賊猝中槍死之年六十一

吉瑞傳

吉瑞字鑑堂蒙古巴林人漢姓吳祖圖敏泰咸豐初以防禦剿賊陣亡予世職吉瑞襲職補正藍旗防禦武昌變起語人曰吾祖爲國捐軀子孫食世祿五十餘年不能奮身報國非夫也鎮江亂荷槍晝夜巡邏不少懈迨事不可爲悲憤不語竟日面青紫嘔血數升遽卒年五十八

萬選傳

萬選字子昭蒙古敖漢氏漢姓馬家貧好讀書咸豐初寇亂流離轉徙未嘗一日廢學嫻騎射以軍功保五品藍翎補驍騎校性至孝授室巴氏不得於姑欲置之死萬選不敢違驅之溪塘俟母顏鬻而後返之客游燕趙魯豫皖浙已而入晉參大同鎮戎幕佐地方官吏辦荒政既歸京口先後副都統並延章奏中法之役上書粵督張文襄陳戰守方略不願以書生老死牖下也辛亥變起副都統載穆徇商民請止戰萬選力爭不見用頓足大慟憤怒嘔血絕粒數日死年七十六子普芬舉人早卒萬選著有易注筆諫金石賞心火龍攻戰略等書

同源傳

同源字子清蒙古人漢姓白性純謹嗜學以筆帖式授驍騎校勤於掌錄熟習旗務檔案辛亥之變同源知旗人將流離失所也忍死力爭俾旗產收歸咸獲生計乃語家人曰吾可以從殉國諸公後矣沐浴整衣冠不食數日死年六十六

德霈傳


德霈字兩田蒙古人漢姓傅府學附生好任俠爲里人所稱以領催充印班長辛亥九月從都統策戰守多所建白都統被脅不能戰德霈憤甚曰大局休矣吾甯死以報國耳都統殉節德霈亦自經死

桂城國權海靖文馨炳陞傳

桂城字仲藩八旗學附生游學日本入振武士官諸學校卒業入聯隊實習既歸由京口調隸江甯爲憲兵協軍校管陸軍警察營民軍攻江甯急統制徐紹楨駐秣陵關君以事謁紹楨被拘閉置荒祠中第九鎮兵敗於雨花臺退守關衆遷怒君擁之出不屈死越二年其子至金陵負骨歸葬事聞 予謚剛愍國權海靖文馨並充三十三四等標排長與桂城同死難炳陞日本留學畢業舉人時爲三十六標一營排長守北城戰死方武漢之繼陷也江南大震桂城諸人皆在軍中或語之曰敵人方與汝族爲難盍早爲計則皆正色曰吾族世受國恩聞難引避奚覩顏生人世爲事亟或讒之去則又曰吾曹義不苟免甯死以媿天下之懷貳心者

那康元傳

那康元馬隊營兵好技勇膂力過人辛亥九月二十一日將出南門遇敵軍假搜查軍械攫取衣囊中金康元以槍刺之敵軍廢至縛康元於樹支解之



荊州駐防

恆都統傳

德勝 恩沛

公諱恆齡字友蘭號錫九舒穆魯氏滿洲正藍旗人荊州駐防先世揚古利以功封武勳王數傳至公祖順興父寶俊皆官協領加副都統銜公年二十三補旗籍生員由驍騎校累擢協領初官佐領兼主外交事拳匪事起湘人旅荊州者聞風煽亂燒沙市躉船焚稅關及領事館各國僑人多奔竄公率二百人馳往誅首要散脅從外人避難者護持之亂遂定防營積弊久公創編新軍以時訓練設講武堂教之戰術將軍武勳公綽哈布疏薦其才充營務處總理加二品頂帶公條具四事曰設警察以資保衛興學校以廣教育清財政以濟餉餉練常備以供調遣皆奏行之設八旗高等學堂陸軍小學堂以公爲監督願款無所出公馳謁總督張公忼愾陳說總督偉之撥萬金俾成立公大裁新軍陋規爲學堂經費訪延才俊充教習嚴立章程校風肅然部員考察奏稱荊州第一尋統領荊州振威新軍調督練處參議兼總省城陸軍小學將軍恩存總督陳夔龍交章薦充陸軍部一等諮議官陳公移督直隸疏留北洋充督練處參議宣統元年充熱河練軍統領汰老弱補缺額夙弊一空匪首葛

蘭亭周紅果述誅久公至二月次第就禽黨與星散公推功將校已獨弗與曰吾剿匪志保民非邀功匪首幸伏法吾平日得將士心耳若輩搏血肉成功吾何勞焉聞者歎服二年簡甯夏副都統朝陽紳民請留公總督上聞 朝命以西陲邊要趣赴任公犯塞西征馳抵甯夏嚴吸食洋煙之禁開渠屯田久無效公謂此裁旗歸農根本計設方略整飭之三年五月丁父憂請終制解任將迎父柩於萬縣至宜昌而鄂亂作道梗還荊州將軍連魁奏請幫辦軍務旋 命署荊州左翼副都統公毅然以守城爲己任而同官志不合餉匱援絕兵饑而譚公出私財餉軍令毋擾沙市致啟外衅遂嬰城固守時方患瘴裹創策騎出巡城血糝纒滿衣袴也已而事益亟將內訌公孤立無可設斂仰天歎曰人心去矣吾力竭矣惟以此身殉耳晨起公服坐堂皇發手槍洞胸而殞十月二十日也年五十一家人得公與弟恆廣子裕文遺書曰吾家世受國恩當竭力圖報今城不可保大義所在惟一死所憾者老母在耳忠孝不兩全吾母生子爲忠臣亦甚得吾死汝等能一門盡節固善否則善事吾母以補吾不孝之罪母以吾死狀使吾母知也公亡數日而將軍連魁右翼都統松鶴開城納民軍荊州失京旗都統富爾遜以公死事狀上聞 命加恩予諡照都統陣亡例從優賜卹子裕

文以直隸州知州用裕謙以通判用尋予諡壯節參謀官德需聞公殉節痛哭自經死恩沛自經家人馳救得不死憂憤成疾數日卒

松興傳 善吉 福全

松興蒙古正白旗人少通文史以諸生改武職累官至左翼協領記名副都統充常備軍統領性懇直論事侃侃不撓恆以此觸長官怒人或戒之則曰當言而不言非夫也卒以是劾罷宣統元年復原官三年八月武昌變起荊州將軍議城守以松興爲統領松興方有疾強之出足不良於行乃辭統領而常於病榻集將士畫戰守策十月民軍入城被逮至鄂軍士叱使跪慨然曰吾朝廷大吏城不保義當死頭可斷膝不可屈士紳三十餘人聞信趨至已及於難臨刑語人曰吾死得其所矣十一月初八日也年六十三其戚善吉庖人福全皆從死


多瑞傳

多瑞正白旗人官防禦辛亥十月民軍入城瑞終日危坐不言不笑於二十九日夕仰藥死

辛亥殉難記

卷四 駐防傳

二十六



金霖傳

金霖正白旗人記名驍騎校幼讀書粗曉大義恆以旗制不良爲言宣統三年春作萬言書上當事力主變更舊習人多非笑之及亂作聞民軍入城乃發槍自擊死十月二十六日也

炳安傳

炳安正藍旗人記名驍騎校以事至天門縣會革軍起與天門知縣榮溶同時殉

哲森傳

哲森正黃旗人官驍騎校奉檄赴省領軍械值兵變憤甚以刃自刺其腹而殞八月二十日也

榮錦傳 子朗察 兄子迎升

榮錦正黃旗人直隸秦甯鎮右營都司宣統元年乞休歸子朗察爲書記官迎養至武昌三年八月亂作憤甚拔所佩劍自裁死朗察文生充本旗官學教習尋至武昌充三十標書記官變起舉火閨室自焚妻周氏嫂某氏兄子迎升女一兄之女二皆從死

迎禧傳 子果英 吉長

迎禧正紅旗人光緒八年舉人充本旗方言學堂中學堂教習敍勞得知縣尋至湖北陸軍小學堂爲史學教習研討史事於古人之當死而不死者輒痛詆之亂作或勸之去不可曰此正吾當死時也具衣冠坐講堂兵至遂及於難子果英吉長子婦某氏女三皆同殉

根壽傳

根壽正紅旗人文生肆業湖北農業學堂畢業部試最優等以舉人知縣用充羊樓峒茶葉模範講習所所員辛亥八月二十一日殉難妻李氏女珍煥同殉

定海傳

定海正紅旗人文生施南府陸營司書生民軍脅之降不從殺之

松俊傳

松俊鑲藍旗人文生留學德國陸軍畢業歸充湖北兵備處提調辛亥八月十九日奉檄守楚望臺火藥庫夜分民軍攻藥庫力戰死之妻龔氏女弟一聞變皆自盡

重光傳

子春年 長年 寶年

重光鑲藍旗人文生湖北高等將弁及將校講習所學生辛亥八月十九夜變起時充三十標一營隊官從部翔宸守布政司署至則亂兵方掠取庫金重光大呼吾輩軍人宜各保全名譽言未已而礮子洞胸矣遂死之妻趙氏子春年長年寶年同及於難

色德本傳

色德本鑲藍旗人文生四十一標三營排長辛亥八月十九之夕召集潰兵謀抵禦軍械不足民軍圍攻於十五協門外死之

榮勳傳

子額勒登額 穆貞額

榮勳文生陸軍步隊三十標副軍需官辛亥八月十九夕聞變憤恚仰藥死二子額勒登額穆貞額同殉焉

錦章傳

錦章鑲黃旗人文生陸軍第八鎮執事官辛亥八月十九夜聞變馳至十五協謀召集同志禦民軍中途遇害父榮喜亦自盡

恩特亨傳

恩特亨正紅旗人文生三十標二營司書生爲民軍擁至營有識之者猶戲呼曰師爺怒詈之遂遇害

札勒杭阿傳

札勒杭阿正藍旗人以先世郵廕襲恩騎尉辛亥十月二十日聞變平明督隊出東門猝中礮陣亡

榮清傳

榮清正白旗人世襲雲騎尉肆業省城陸軍中學堂武昌變作爲民兵所拘慷慨就義其女兄適余氏者聞變自經死

寶善傳 子金生

寶善鑲紅旗人陸軍部隊三十標副軍需官辛亥八月十九日守中和門亂作率所部拒戰陣亡妻赫氏子金生皆自戕

德齡傳 東良 德培 子天教 甥天羣

德齡鎮紅旗人二十九標三營排長辛亥八月十九日聞變急呼所部出禦敵無應者已而集三數人奮拒中彈亡於十五協之操場隊官東良排長德培同時戰死母關氏妻傅氏女兄一女弟一子天教甥天羣女二聞德齡亡皆自經死


倉生光傳

子高升

倉生光鑲藍旗人充安慶六十一標一營排長辛亥九月爲民軍拘獲慷慨罵賊死之妻陳氏子高升殉焉

澤麟傳

澤麟□□旗人武備學堂畢業生充聯長辛亥九月荊州變全營從之澤麟手發數槍擊斃
十餘人衆圍劫之遂被害年不及三十也



福州駐防

樸將軍傳

公諱樸壽字仁山滿洲鑲黃旗人光緒二十年舉人由吏部郎中簡山西歸綏道尋簡庫倫辦事大臣調綏遠城將軍又調正黃旗漢軍都統擢福州將軍宣統三年九月省城變起率駐防兵力戰被執不屈死公之蒞防也顓志訓練得精卒四千人皆用命亂作與叛軍相搏火器利叛軍幾不支顧叛軍雖被創輒隨時募集駐防兵以猛鬪故精銳多傷亡卒敗潰公爲叛軍所拘受挫辱令充下級軍官公不屈遂支解之其死狀爲最烈云京旗那彥圖奏聞贈太子太保賞給二等輕車都尉世職照將軍陣亡例從優賜卹加恩予諡尋予諡忠肅子景康以員外郎用

舊史氏曰國初設駐防營各行省簡鎮守將軍者凡七其後承平酣嬉積久窳敝咸豐朝粵寇陷杭州將軍瑞昌誓死守全營無孑遺同治以來大難旣夷駐防營因仍不改擁旄節者持祿養交而已公在福州獨以練兵聞禍亂之起若火燎原孤軍轉戰甘死如飴與瑞公後先爭烈豈不偉哉

定煊傳

定煊姓郝氏諸生有幹略官佐領爲將軍所倚治捷勝營營務辛亥之役志必死捷勝營敗遂殉焉年三十八

長瑞傳

長瑞姓蘇完呢瓜爾佳氏光緒十一年繙譯舉人正白旗防禦有膽智膺薦爲營務處文案戰事起憤激自奮身臨行陣卒爲國殤年五十二

巴揚額傳

巴揚額姓佟佳氏繙譯舉人官驍騎校少負志節長於書記將軍以營務處文案屬之福州
變起巴揚額入陣從戰曰吾雖司文牘然不能執干戈以衛社稷非夫也力戰死之年三十

麟瑞傳

麟瑞姓和舍里氏少有志節兼長泃漢文科舉廢駐防營立學校麟瑞爲中學教員清文書院輔教辛亥之役駐防軍敗麟瑞憤不欲生與妻吳氏嫂石氏同時殉難年五十四

裕彤裕豐傳

族兄鏗欽額 兄子德忠


裕彤姓鈕胡魯氏少聰穎能文既冠舉於鄉辛亥以前見時事日非恆獨居憂歎民軍起與家人期同赴死弟裕豐候補筆帖式亦明大義防軍敗裕彤與裕豐及妻沈氏嫂伊爾根覺羅氏涕泣生訣遂闔門舉火自焚兄子鏗忠纔二齡也裕彤年三十四裕豐年二十四裕彤族兄鏗欽額充捷勝營左哨哨官督隊戰以衆寡不敵憤慨自縊於捷勝營中

杭州駐防

貴林傳

子量海 舉人 存嗣 佐領 哈楚顯


貴林字翰香滿洲正紅旗人官協領駐防營設學堂辦警察事並創舉獨肩其勞與士大夫遊多賢之宣統三年九月浙兵變駐防營猶抗拒相持二日浙人勸罷戰招貴林議貴林奔走其間與營外立約定期交軍械事定有構陷之者謂旗營反覆不可信且誣貴林陰使人置毒各坊巷井中於是軍隊大譁誘之出逮槍斃之子量海同死焉從貴林出營者舉人存炳佐領哈楚顯均被戕



廣州駐防

鳳將軍傳

公諱鳳山字禹門滿洲旗人光緒乙酉繙譯舉人充神機營章京累擢副都統近畿練兵著聲績 簡荊州將軍移廣州未至而武昌事起粵亂黨集香港謀糾土匪踞省城人情洶洶公至廣州總督及布按以下官皆不敢出迓遣佐貳官往或告公曰黨人悍且譎宜微服先入城毋蹈孚將軍覆轍公不聽日午輿衛導行至南城外倉前街黨人匿市廛簷際肩輿過擲炸彈輿中市屋摧壓從者死十餘人街石寸寸裂暮得公屍焦爛無完膚總督奏聞 上震悼命加恩予諡追贈太子少保銜照將軍陣亡例從優議卹准入城治喪尋 予諡勤節



辛亥殉難記卷五

列女傳 列女表附

關桑氏傳

關桑氏西安駐防防禦奎亮母年十七歸公額布善事尊章三十而寡矢志撫孤教奎亮讀書嚴戚族鄉貧乏者量贖卹之平居恆以忠君愛國勸其子若孫及難作語子若孫曰此我完節時也願若曹努力殺敵報朝廷養育恩毋以我爲念九月初二日城陷率奎亮婦關鄂氏次子奎喜婦關白氏孫定炎成惠孫女三同時投井中死

席金氏傳

席金氏西安駐防鑲黃旗五甲增祥妻以孝聞辛亥之變氏以死自誓九月初三日率長子某子婦某氏孫四人俱投井死其次子婦四子婦及孫女皆縱火自焚死

舒舒覺羅氏傳

舒舒覺羅氏西安駐防鑲藍旗二甲喜順妻孝事舅姑睦於族鄰子若孫既長督就塾勤學母汲汲仕進家貧忍飢劬作苦隣里貧乏者則傾囊濟之無愠色辛亥九月朔聞變語家人曰婦人以潔身爲大不可辱也挈子婦二孫婦一投屋後井死年八十四

烈女雪雁傳

雪雁西安駐防正紅旗馬甲音德布女幼敏慧博解文字亂作女隨家人出避中途遇民軍有誘之者女引刀斷其指血漉漉沾衣裾民軍驚異去未幾又遇數人強脅之女詬誓曰吾頭可斷志不可奪也數人者羣起扶之無完膚女誓死罵不絕口遂被刃穿其胸而殞

趙余氏傳 子婦關氏

余氏父慶雲江甯駐防名族也幼有志操歸趙培善前室遺子女五撫愛如己出長子鳳藻娶婦關亦善事舅姑一門豈睦鄉黨稱羨辛亥兵事起氏語培善曰願夫子殫心王事母以室家爲念遺鳳藻出存趙氏後城陷聞女夫之父盛成家赴火藥庫將自焚氏挈子婦關及女子子三趨往至則人滿不得入方榜徨間火已發反奔至五龍橋河同赴中流溺死氏年三十六關氏年二十一次女年二十第四女年十二

趙那氏傳

即趙納氏

那氏京口駐防趙連惠妻連惠以咸豐七年補前鋒攻克鎮江陣亡氏矢柏舟之志以節孝旌辛亥之變氏年逾八十矣寄食母族九月二十一日聞亂倉皇出走遇亂兵刃擊未死罵不絕口又被數刃始斃血肉狼籍白髮爲赤見者哀之

王劉氏傳

劉氏京口駐防鑲白旗王根瑞妻領催德永女舉人富林女弟也德永讀書有文學教授鄉里氏服父訓明大義年十七歸根瑞二十而寡遺一女家貧依母家三十年茹苦矢節事親以孝聞前都統奎芳奏請旌樹綽楔武昌事起天下騷動氏語女及其女夫曰吾年六十有二受朝廷旌表誓以死殉爾夫婦攜子女避居於鄉購田十畝耕且食勿再作出仕想吾意決爾輩毋多言逮聞載都統殉節屢求自盡輒遇救免號泣不食女及女夫長跪進食卒不受絕粒七日而歿

洪陶氏傳

陶氏京口駐防洪恩培妻辛亥九月二十一日鎮江亂作勢如鼎沸旗民不能居復不許遷氏倉卒攜子女渡江居紅橋某戚家日望恩培至越二日不至氏泣奔江上問消息或言恩培被獲矣氏度夫必死遽投江遇救舁歸復投塘水死

馮吳氏傳 子婦康氏

吳氏故荊州士族讀書明大義見史傳中節烈事輒廢書感歎歸馮某事姑孝年三十餘夫亡無子誓以死殉族戚止之曰馮之宗祀垂絕矣一死可謝責乎乃謀於族人以族子松文爲夫後以養以教既長爲娶婦康氏生子富倫渾咸豐間江甯駐防死寇難幾盡同治三年金陵復移荊州駐防實之松文隸鏗藍旗三甲富倫渾有幹才拔充饒驍校以勞卒松文哭子慟未幾亦卒富倫渾妻石賢而孝撫孤德培一如吳氏之撫松文也宣統三年八月民軍猝起駐防營潰吳氏年九十三矣仰天哭絕而復蘇語子婦輩曰吾家三世孀嫗世守清白不幸遭國變可苟活辱先人耶遽以首觸壁死康氏與婦石氏孫德培女孫三投城河康氏溺死石氏與子女遇掠免

石甘氏傳

甘氏荊州駐防旗人故威愍公鳳全之女兒年二十歸石良奎事尊章以孝家貧躬操井臼以織紉共朝夕生子三寶珩從威愍軍中克復巴塘擢協領寶善官湖北陸軍二等主計監寶瑛官湖北陸軍大佐辛亥八月十九日武昌兵變寶珩與諸弟將翼母走避氏正色曰吾年近七十叨荷祿養死何憾爾輩速去以存宗祀母以我爲念諸子哭氏麾之出遽闔戶翌日亂兵土匪麇至大掠遂與子婦二女子子一孫女孫三皆遇害亂粗定寶珩歸覓遺骸不可得蓋已爲赤十字會叢葬之矣

陳殷氏傳

烈婦殷氏浙江秀水殷象賢女適安徽太平湖南候補直隸州陳繼良宣統三年夏繼良攝知郴州九月長沙亂作湘南諸郡繼之郴屬若宜章永興諸縣皆變烈婦誓與夫相守以死繼良趣烈婦挈子女避地湘鄉烈婦不可強之乃行瀕行爲繼良部署瓊雜事皆井井然舟中鬱志不自安語子女曰若輩安矣若父將奈何湘鄉距郴千餘里俄傳聞郴州破繼良死難烈婦聞之憂悸不食而深墨戚屬百端慰之陽爲酬答一夕戚屬同居者聞啟戶聲旋聞其季女驚呼阿母阿母急起燭之則烈婦於堂後門衝上投縊矣解懸沃以沸湯不可救十月十八日也年四十九

聶格里氏伊爾根氏傳

女岱屏

聶格里氏伊爾根氏陝西延榆綏道齊普松武之子婦賢明有端操辛亥隨翁入秦至西安卒遭兵變二氏以死自誓事急同投逆旅井中死齊普松武之女岱屏亦投井死闕普通武岱屏之世父也爲三烈詩以哀之

列女表

陸唐氏山西巡撫陸鍾琦之妻槍傷死

某氏陝西候補道榮麟之妻率子女投井死

吉喇氏著湖北安陸府知府桂蔭之妻自經死

某氏江蘇候補知府德存之妻被戕

某氏江蘇候補知府德存之子婦又女二人

某氏陝西候補直隸州寶坪之妻及其子女凡七人均被害

某氏陝西候補知州張存善之妻自盡

某氏陝西候補知縣德銳之妻又幼子一均自裁死

某氏湖南嘉禾縣知縣鍾麟之妻自經死

某氏湖南嘉禾縣知縣鍾麟之子婦又僕婦一人均自經死

某氏天津某學堂教員之妻自戕

郭氏雲南布政使世增家之僕婦被戕

勘誤表

卷	駐防 日錄傳	一	一	一	二	三	四	四	四
葉	七	十	十二	十二	十六	十七	十	十三	三十四
行	五	五	後半葉 二行	同	後半葉 一行	十	後半葉 一行	後半葉 一行	二
誤	志寬	諱	湘潭上脫字	以下脫字	脫小注	令	光緒	脫小注	肆
正	此人誤 收應刪	獨	湖南	治	子一孫一 均失名	領	同治	彭興	肆